

WANTOK

NIUSPEPA BILONG YUMI OL PAPUA NIUGINI STRETI 30 YIA NAU

32 pes

Namba 1,347

Wik i stat long Fonde Epril 20, 2000

70t

Kolin ol lala i no lakandim gut NPF man

pes 2

Ol palamen ripot

pes 3

Ol eksen piksa bilong Lae soibal gren fainel

pes 16

Ol lista mesoj

pes 23-27

Mekere kisim bek Pundari

... Gavman bai makim tripela minista tude

WENCESLAUS MAGUN
i raitim

PRAIM Minista Sir Mekere Morauta i tokaut as² olsem Gavman bilong em i amamas long kisim bek 16 memba bilong Advance PNG Pati (APP) long joinim Gavman.

Dispela bai surukim namba bilong Gavman i go antap long 70. Sir Mekere i tokaut tu olsem em bai makim tripela minista tude long Gavman bilong em.

Nau yet Gavman i nogat minista bilong Provinsel Afeas, Praivetaisesen, Petroleum na Eneji, Leba na Emploimen, Yut na Hom Afeas, na Fainens na Treseri.

Sir Mekere i tok astingting bilong Gavman long welkamim APP long joinim Gavman em long strongim Gavman long kamapim ol gutpela polisi we i ken bringim gutpela sevis na developmen long Papua Niugini.

Em i tok APP i bin mekim bikpela wok tru long kamapim Gavman bilong em las yia na olsem em i amamas long kisim ol bek. Sir

Mekere i tok, toktok bilong rausim APP long Gavman las yia, em i samting bilong bipo na ol i lus tingting long dispela.

Sir Mekere i tok 'stabiljty' o kamapim wanpela strongpela gavman i no inap bruk bruk, em wanpela samting Gavman i laikim i mas i stap. Em i tok sapos Gavman i bruk bruk oltaim, Gavman bai i no inap ronim gut kantri na bringim ekonomik divelopmen. Na tu ol pipel bai i nogat bilip long Gavman.

Lida bilong APP, John Pundari i tok APP i bin helpim long kamapim Gavman bilong Sir Mekere na APP yet i bin gat laik long Sir Mekere i kamap praim minista.

Em i tok long dispela as, APP i bin sanap strong oltaim long sapotim Gavman bilong Sir Mekere maski taim Sir Mekere i rausim APP long Gavman.

Mista Pundari i tok taim Sir Mekere i bin rausim APP long Gavman, em i bilip olsem tok tru bai kamap ples klia sampela taim bihain.

Em i tok dispela bilip bilong em nau i karim kaikai na dispela de

em i bikpela de bilong em wantaim ol APP memba.

Mista Pundari i strongim tok bilong Sir Mekere olsem ol pipel bilong PNG i laikim wanpela strongpela Gavman na APP i laik givim dispela sapot long kamapim dispela strongpela Gavman bilong Sir Mekere.

Em i tok APP i gat laik long wok long gutpela bilong olgeta pipel bilong PNG. Em i tok long dispela as APP bai givim olgeta sapot bilong en long Sir Mekere na Gavman bilong em.

Mista Pundari i amamas long tok olsem samting olsem 90 pesen (%) bilong ol APP memba i pinisim bikpela skul long ol yunivesiti na 10 pesen (%), bilong ol memba bilong APP em ol lida husat i gat planti yia bilong wok olsem ol lida man.

Ol memba bilong APP em: Lida John Pundari, Namba tu lida, John Tekwie, Simeon Wai, Charlie Benjermin, Demson Lafana, Tom Tomiapa, Gallus Yumbui, Ajax Bia, Eddie Saweni, Micah Wes, Henry Smith, Jim Kas, Peter Arul, Opis Papo, Ginson Sauno na Bitan Kuok.



Famili wantaim wok misin

Hoa famili bilong Lae em David; Aroai na Sonya i soim naispela kala yunifom klos we ol Sande skul sumatin bilong Malaita Yunaitet Sios long Lae i redim long werim long selebretim ista.

Tripela Hoa famili memba wantaim 100 wanskul bilong ol bai kam long ples Tubusereia long Sentrel provins bilong selebretim namba wan ista bilong nupela-milenium long dispela wiken wantaim ol wan lotu bilong ol.

Ples Tubusereia klostu long Mosbi siti bai kamap laip wantaim ol gospel singsing, kwaia, pilai drama, ol singsing na danis tumbuna, peroveta na bikpela kaikai we ol papamama na pikinini bilong lotu grup bai putim kamap. Foto: Saps Meta.

SLAM DUNK NA WIN!

5 BIKPELA MILO SPOTS PACKS BILONG WINNI!

Nestlé MILO

WANTAIM BASKETBALL BACKSOD, MILO SPOTS BAG, MILO BASKETBALL, MILO T-SHIRT, WARA BOTAL NA KEP NA K100 KES MONI!

PLIS RIPOOT

Lae, Morobe:

Foapela man i dai na narapela foapela i kisim bikipela bagarap i stap long Angau haus sik bihain long ka oi i ron long em i sut nus wantaim narapela ka.

Dispela bikipela birua i bin kamap long Okuk Haiwe long ples naswapum long las Fraide moning.

Bos bilong ol plis long Lae Superintenden Awan Sete i tok ol lain i kisim bagarap i bin kalap long wanpela Toyota 15-sita bas i kam long Lae.

Narapela ka we i ron i go antap long Nazdab em Mitsubishi kenta trak bilong ADN kampani long Lae.

Trak i wok long ron spit na abrusim ol ka long rot i go antap we em i kamap long kona na kirap nogut olsem bas ya i ron i kam daun na tupela i bam.

Tripela pasindia i bin dai kwiktaim taim tupela ka i bam na ol narapela em ol i kisim ol i go long haus sik wantaim bikipela bagarap.

Mista Sete i tok draiva bilong tupela ka ya i ron-awe na ol plis i wok long painim ol.

OL ADN opisel i bin bung wantaim ol lain bilong ol daiman na tok ol bai givim helpim long baim rot bilong kisim bodi bilong ol daiman i go long ples bilong ol.

Mista Sete i givim strongpela tok lukaut i go long ol draiva long noken dring na draiv spit long Hailans Haiwe.

Nesenei Kapitel:

Ol plis long NCD i bin kisim bek K50,000 we ol stiman i bin stilim long wanpela holap long Boroko Motos long dispela wik. Ol bin kisi bek tu gan we ol stil lain i bin yusim long wokim dispela stilpasin.

Na ol iholim pasim na sasim foapela man long wokim stilpasin. Tupela bilong ol em ol wokman bilong Boroko Motos yet.

Bos bilong ol plis insait long NCD na Sentrel provins Raphael Huafole i tok tupela raskol i bin holim ap tupela woklain bilong Boroko Motos long fran bilong opis taim ol i laik wokabaut i go long ka bilong go long beng namel long 1.30 na 2 kilok apinun.

Ol saspek i wok long ronawe long ka i go olsem long Erima na Moitaka Wailaip senta taim ol plis i patrol i lukim na stapim ol.

Komanda Huafole i tok ol plis i bin kisim bek K12,346.01 long kes na K44,006.65 long sekmani long ol stil man ya.

Em i tok plis i bin holim pasim tupela stilman wantaim tupela woklain bilong Boroko Motos husat i bin toktok wantaim ol stil lain long karimaut stil pasin ya.

Em i autim nem bilong tupela Boroko Motos wokman husat i stap insait long stilpasin ya olsem Gabriel Verato wantaim 31 krismas bilong ples Kemavolo long Rigo eria insait long Sentrel provins na Job Tarie wantaim 21 krismas bilong ples Fore long henganofi, Isten Hailans.

Narapela tupela saspek husat i bin wokim holap em long Simon Ali bilong ples Kokovi long Okapa insait long Isten Hailans na Willie Lavai wantaim 21 krismas bilong ples Kavan long Ihu insait long Galp provins.

Wanpela bilong ol i bin kisim bagarap na ol i kisim em i go long Moabi Jenerel Haus sik tasol em bin ronawe.

Kotim ol lain i no lukautim gut NPF mani, Sir Rabbie i tok

WENCESLAUS MAGUN i raitim

MEMBA bilong Kokopo, Sir Rabbie Namaliu i laikim olgeta politisen i mas wok bung wantaim praim minista long bringim ol lain i no lukautim gut mani bilong Nesenel Providen Fan (NPF) long tokaut long asua bilong ol.

Sir Rabbie i tok bipo long Komisen bilong Inkwairi long NPF i givim ripot bilong ol long Gavman, Gavman i mas brukim 'kalsa bilong korapsen' na bringim bek bilip, pasin bilong lukautim gut mani na sekim na lukautim gut olgeta eria bilong gavman.

Em i tok stori bilong NPF em i wanpela sori stori long wanem i gat moa long 200,000 wok manmeri bilong PNG i putim mani i go insait long dispela fan.

Em i tok hevi bilong NPF em i no asua bilong Praim Minista Sir Mekere Morauta na Gavman bilong em, tasol dispela hevi i kamap taim gavman i laik traim long daunim ol dinau bilong publik sekta, na katim mani gavman i save spendim.

"NPF menesmen bilong nau ating i no asua long lukim samting olsem K150 mil-

ion bilong NPF i lus insait long sampela yia i go pinis. Tasol em i no bin kam aut na tokaut stret long ol hevi bilong NPF na wanem kain hevi dispela ol hevi i kamapim," Sir Rabbie i tok.

Em i tok tingting bilong NPF Bod na Menesmen long katim 50 pesen bilong ol memba bilong NPF em i wanpela we bilong ol lain i nogat bel na tingting long ol wok manmeri bilong PNG husat i save putim mani bilong ol i go insait long dispela fan long olgeta pe de bilong ol.

Sir Rabbie i tok hevi tru em ol i no ronim gut NPF, i gat paul pasin, na ol i no yusim gut mani bilong ol lain husat i save putim mani i go insait long NPF.

Em i tok NPF em wanpela eksampel tasol. I gat planti bikipela askim i stap tu long Menesmen bilong Pablik Opisa Superanuesen Fan. Moa yet long toktok bilong Cairns dil na menesmen bilong Telikom, PNG Harbours Bod, na planti ol arapela bisnis bilong gavman.

Sir Rabbie i tok tu olsem Ombudsmen Komisen, Audita Jenerel na Treseri Dipatmen husat i gat wok bilong sekim wok bilong ol pablik opis opisa na ol gav-

man bisnis tu i no mekim gut wok bilong ol bilong tokaut long ol pasin nogut i wok long kamap. stapim ol dispela pasin nogut we i wok long go bikipela insait long ol gavman bisnis olsem NPF.

Sir Rabbie i sutim tok tu long Palimenter Pablik Akauns Komiti. Em i tok dispela komiti tu i nogat pawa moa. Na minista husat i lukautim NPF tu i no mekim gut wok.

Sir Rabbie i salensim tu Gavman long kamapim ol nupela lo bilong lukautim NPF na POSF bai i gat gutpela menesmen na edministresen bilong ol kain kain fan.

"Mi hop tu olsem bai i gat sampela step long lukautim ol fan bilong ol lain i save putim mani long NPF, kain olsem long wanpela gavman dinau long fan o dinau long ol arapela kantri olsem long Wol Beng na ol arapela ejensi," Sir Rabbie i tok.

Em i tok sapos nogat samting i kamap bilong lukautim ol pablik mani, em i pret wanpela bikipela hevi bai kamap long kantri. Na moa yet long dispela taim, taim ol pipel i no kisim mani bilong ol long ol 'piramid skim'.

Taim bilong kaikai na singsing



• Ol dispela lain pipel bilong Yongomul Peris insait long Simbu Provins i wok long katim pik na bungim ol mit we i kuk pinis long mumu. Bihain bai ol i tilim na givim long ol man i kam long wanwan haus lain na ples singsing.

Ol i redim dispela bikipela kaikai bilong selebretim na makim yia 2000.

Planti pipel bilong olgeta hap insait long wol i makim dispela dei wantaim stail pasin bilong ol yet. Insait long PNG tu i bin i gat kainkain samting i bin kamap bilong makim dispela dei.

Poto: Sape Metta

Hevi long Ok Tedi bruk, bruk nabaut

FRANCIS ULIAU i raitim

HEVI long graun na bus na wara long Ok Tedi i bruk pinis, na i karamapim tu ol komyuniti, papa graun na provinsal gavman.

Ok Tedi projek i save bringim klostu long 30 milien Australia dola i kam insait long kantri long olgeta yia, olsem ol royelti mani na takis. Na dispela i karamapim samting olsem 10 pesen bilong olgeta wok kamap long kantri.

Olsem na piksa bilong wanem samting gavman, ol papa graun na ol seaholda bilong BHP i laikim i kamap long Ok Tedi bai kamap ples kliia tru long kantri long taim bihain.

Praim Minista Sir Mekere Morauta i tok dispela hevi bilong graun na bus na wara long Ok Tedi i bagarap i go "abrusim tru mak em ol wokman i bin skelim pastaim long en".

"Olsem na gavman i laik lukim olsem wanem toktok i kamap long wok bilong Ok

Tedi long taim bihain, bikipela wok bilong skelim na glasim olgeta bekim bilong ol toktok na tingting, i mas kamap pastaim," Sir Mekere i tok. "Bihain, yumi ken go het na painim las tingting."

Wol Benk i bin glasim envairomen ripot bilong Ok Tedi na autim tripela as tingting:

- Go het na wok long painim gol na kopa long Sta Maunten na pinisim 10-yia laip bilong main, tasol no ken mekim ol nupela wok painimaut;
- Pasim olgeta wok long Ok Tedi main; na
- Go het long ol wok na painim nupela opereta bilong kam wok long Ok Tedi tasol, long wankain taim, kampani ya i mas pulim inap winmani na daunim olkain hevi nau i wok long kamap long main.

Em i tok gavman i wok long glasim yet dispela ripot bilong Wol Benk. Tasol, sapos ol i larim wok bilong main long go het olsem nau i stap long en, bikipela bagarap moa bai kamap. Bihainim dispela tingting, praim minista i tok BHP tu i bin autim pinis sampela tok-

win bilong em i laik lusim Ok Tedi na kirap i go.

"Mipela i no sindaun yet wantaim Ok Tedi bilong painim tingting bilong ol long wanem rot em ol wok bilong main bai bihainim," Sir Mekere i tok.

"Sapos ol seaholda bilong BHP i tokaut long lusim Ok Tedi, mipela bai kamapim ol rot bilong stretim ol dispela asua na wanem rot gen bilong bihainim."

Praim minista i tok em i no kliia tumas long dispela toktok bilong painim nupela divelopa bilong kisim ples bilong BHP long Ok Tedi.

Tasol i gat ol tokwin olsem BHP i laikim sampela kain tambu em gavman i mas putim bilong banisim em long ol tok-tok bilong baim kompensesen long taim bihain olsem bai em inap traim painim rot bilong klinim ol bagarap em i kamapim pinis long bus na graun na wara bilong Ok Tedi na Flai Riva. Sapos BHP i lusim Ok Tedi na go, gavman bai i mas lukluk raun gen long painim nupela divelopa.

Long taim em i toktok long Foa Kona televisen program bilong Australia long Epril 10,

Minista bilong Maining Sir Michael Somare i tok sapos gavman i sindaun na paetim toktok long tingting bilong BHP long lusim Ok Tedi, em bai glasim tu tingting bilong painim nupela divelopa.

"Mipela i no haitim wanpela samting, olgeta samting i stap ples kliia bilong painim nupela divelopa," Sir Michael i tokim Foa Kona. "Mipela bai skelim save na eksperiens bilong ol, na wanem kain wok ol i ken mekim i go inap long taim gol na kopa i pinis."

Ol papa graun bilong Ok Tedi na Flai Riva tu i kotim pinis kampani long ol bagarap em i kamapim long bus na graun na wara bilong ol. Loya bilong ol papa graun, Slater na Gordon, i putim kot pepa wantaim Suprim Kot bilong Viktoria long Epril 11. Ol envairomen grup bilong Australia tu i wok long sapotim dispela kot pepa.

Tasol bos bilong Ok Tedi Maining Limited, Dr Roger Higgins, i tok i mobeta olsem ol papa graun bilong ol komyuniti long Ok Tedi na Flai Riva i mas wokbung wantaim long stretim ol toktok bilong Ok Tedi.

WANTOK

All departments. Phone: 325 2500 • Fax: 325 2579
P. O. Box 1982, Boroko, NCD, Papua New Guinea

Publishing Weekly, Thursday, for Word Publishing Company Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Company Ltd.

General Manager and Group Editor in Chief: Anna Solomon.	Papers distributed by air throughout PNG. Available by air mail subscription within Papua New Guinea and overseas
Acting Advertising Manager: Jocko Oberleuter	Email address: word@global.net.pg
Editor of Wantok: Yakam Kelo.	

Advertising deadlines: Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd. and are set out in full on the reverse side of its official display Advertising Bookings form.

Palamen ripot wantaim WENCESLAUS MAGUN

Gavman baim kensa masin

HELT Minista Ludger Mond i tokim Palamen las wik olsem Gavman i painim wanpela kensa masin long Kenada na i gat tingting bilong baim na bringim i kam na putim long Angau Haus Sik long Lae.

Mista Mond i autim dispela tok bhain long memba bilong

Raikos Stahl Musa i laik save sapos gavman i luksave olsem kensa masin long Angau i bagarap pinis.

Mista Mond i tok tu olsem Gavman i baim tu wanpela masin bilong kensa bilong susu na liklik taim dispela masin bai kam long kantri.

Pablik Telepon bai go antap long 1000

MINISTA Waieng i tokim Palamen olsem namba bilong ol pablik telepon bai i go antap long samting olsem 1000.

Em i tok nau yet i gat 656 pablik telepon long kantri, 202 em ol kad telepon, na 545 em ol telepon yu inap yusim taim yu putim 30 toea i go insait long ol.

Em i tok namba bilong ol 30

toea telepon masin i wok long go daun bikos Telikom i wok long putim ol kad telepon long kisim ples bilong ol.

Em i tok i gat ol arapela servis tu olsem 'virtual card services, mass calling services, na call screening' wantaim toktok we Telikom i lonsim las tupela yia i go pinis.



• Ol skul mangi bilong Gordon's Intenesenel Skul long Mosbi i redi long pilai resis bipo long ol i pasim skul na go malolo. Poto: Issac Ikuavi.

PNG nogat gutpela komyunikesen infrastraksa

PAPUA Niugini i nogat gutpela komyunikesen infrastraksa, maski em i gat gutpela radio studio long Kokopo o namba wan telekomyunikesen long ted wol kantri, Minista bilong Komyunikesen, Peter Waieng i tok.

"Mi bilip dispela em i wanpela samting we i mekim namba bilong ol sosel servis long kantri i stap daunbiloo."

"Infomesen na komyunikesen servis insait long wanpela kantri em i namba wan samt-

ing long wanpela demokratik gavman na i wok long helpim Gavman, ol arapela ogenaisesen olsem helt, edukesen, agrikalsa, trenspot na moa yet," Mista Waieng i tok.

Em i tokim Palamen olsem ministri bilong em i lukautim Gavman Printing Opis, Sensasip Opis, Nesenel Brodkasting Koporesen, PNG Telekomyunikesen Atoriti, na long sampela we Telikom PNG Ltd, na Post PNG Ltd.

Post PNG Ltd i gat K3 milion dinau

MINISTA Waieng i tokim Palamen tu olsem Post PNG Limited i mekim wok wantaim K3 milion dinau mani.

"Kampani i gat bikpela hevi bilong salim ol aset

bilong en long kisim mani na em wok hat tru long mekim wok i stap na painim hat long yusim ol mani long ol wok em i mekim i stap," Mista Waieng i tok.

Senses 2000 bai toksave gut long gavman servis

MISTA Avei i tok tu olsem Senses 2000 bai karamapim wok painim i go insait long ol sosel na ekonomik servis long kantri. Dispela wok painim em i tok bai givim Gavman gutpela save long wanem ol gavman servis i stap long

wanem ol ples insait long kantri na wanem ol servis i sot.

Em i tok Nesenel Senses Opis (NSO) i sot long mani long karim aut dispela ekse-sais olsem na em i askim wan wan provinsel gavman long sapatim NSO.

UNESCO givim K35,000 long NBC

MINISTA Waieng i tokim Palamen tu olsem Yunaited Nesens Edukesenel Saientifik na Kalseserol Ogenaisesen (UNESCO) i redi long givim K35,000 long NBC nesenel niusrum, na 8-pela provinsel radio niusrum wantaim kompyuta program.

Em i tok dispela UNESCO program bai joinim ol provinsel radio stesen wantaim NBC, na taim olgeta dispela wok i pinis, ol nius bilong NBC, karent afeas, na spots program bai namba wan

radio program insait long Saut Pasifik rijen ausait long Australia na Niu Zilan.

Em i tok tu olsem dispela UNESCO program bai karamapim tu televisen brodkasting.

Mista Waieng i askim olgeta Gavna na ol Provinsel Eksekutiv Kaunsel bilong ol tu long sapatim NBC taim ol i laikim helpim bilong ol insait long radio brodkasting servis long wan wan provins bilong ol.

Senses 2000 bai stat long Julai 9

MINISTA bilong Planning na Implementation, Moi Avei i tok Gavman i makim Julai 9 i go long 15 olsem taim bilong kaunim ol pipel bilong Papua Niugini.

Em i tok Julai 9 em Sande olsem na de tru bilong kaunim ol pipel bai stat long Mande.

"Senses olsem yumi olgeta i save, em i wanpela ekse-sais we bai karamapim longpela na bikpela bilong Papua Niugini. Em bai karamapim olgeta ples long ol maunten na ol ailan olsem long Simsimla long Milne Bay Provins," Mista Avei i tok.

Em i tok senses bai karamapim ol taun na ples. Ol laiklik eria bilong ol taun, na tu ol setelmen long ol siti eria. Em i tok dispela senses bai kaunim tu ol pipel i no bilong PNG tu wantaim.

"Em bai kostim PNG moa ionq K29 milion insait long narapela 5-pela yia. Bai i gat 35,000 pipel i kaunim namba bilong ol pipel yumi i gat long kantri," Mista Avei i tok.

Em i tok wanpela bikpela askim planti ol pipel i laik save em sapos dispela senses bai givim tru namba bilong ol pipel long PNG.

Long dispela as bai i gat tupela raun bilong kaunim ol pipel. Namba wan kaun bai givim sampela tingting sapos PNG i gat foa o faiv milion pipel.

Mista Avei i tok namba tu kaun bai kaunim tu wan man meri na pikinini namel long Julai 9 i go long 15.

"Bihain long senses i pinis bai ol i kisim namba bilong sampela senses yunit long lukim sapos ol namba ol i kisim insait long Julai 9 i go long 15 i wankain olsem long namba wan taim bilong kaunim ol pipel," Mista Avei i tok.

Em i tok bikos long dispela sek Gavman i ken tokim ol memba bilong Palamen olsem ol namba ol bai kisim long pinis bilong de em bai i klostu long gutpela na stret tru.

TOKSAVE

OLGETA provinsel kodineita bilong 2000 Nesenel Senses i amamas stret. Nau bai olgeta i gat komputa bilong ol yet.

Dispela bai helpim tru wok bilong ol, Senses Direkta Mista John Kalamoroh i tok aste long senses hetkota bilong em long Pot Mosbi.

Em i tok olsem Gavman bilong Australia i bin baim ol dispela komputa aninit long AusAID program bilong helpim ol narapela kantri.

Mista Kalamoroh i tok olsem AusAID i bin spendim K114,000 long baim 21-pela komputa inap long olgeta wanwan province.

Nau ol komputa wokmanmeri bilong 2000 Nesenel Senses i stap long Mendi, Kimbe na Popondetta long putim ol komputa insait long opis bilong ol senses kodineita bilong Sauten Hailans, Wes Niu Briten na Noten Provins.

Bihain bai ol i go long Goroka, Rabaul na Alotau long putim ol komputa insait long opis bilong ol senses kodineita bilong Isten Hailans, Is Niu Briten na Milin Bei Provins.

Mista Kalamoroh i tok olsem ol narapela provinsel kodineita bai kisim komputa bilong ol bihain long ista wiken taim ol i bung long Pot Mosbi long glasim wok bilong stretim senses.

Mista Kalamoroh i tok olsem olgeta senses wokmanmeri long olgeta hap bilong Papua Niugini i amamas tru long wei Gavman bilong Australia i wok long sapatim 2000 Nesenel Senses.

Em i tok olsem planti wok bilong stretim senses i no inap long go het kwik sapos Gavman bilong Australia i no givim mani long mekim ol dispela wok.

Senses bai i stat long namba 9 dei bilong mun Julai na pinis long namba 15 dei bilong mun Julai.

Gavman bilong Papua Niugini i makim pinis K27 milien long mekim wok bilong senses long yia 1998 i go inap long yia 2003 na Gavman bilong Australia bai i givim K20 milien.

Long 2001 i go inap long 2002 bai ol senses wokmanmeri bilong NSO, o Nesenel Stetistikal Opis, i glasim gut olgeta toktok bilong senses.

Long yia 2003, bai ol i skulim ol provinsel na nesenel Gavman plena long wei bilong yusim ol senses toktok long plenim gut developmen bilong Papua Niugini.

● Gavman bilong Papua Niugini na Gavman bilong Australia i sapatim 2000 Nesenel Senses.

TORO

TORO STAP LONG PLES BILONG EM... OL I MEKIM PATI NA TORO SPAK NOGUT TRU...

EM PAINIM PLES LONG SILIP NA EM GO SILIP INSAIT LONG WANPELA DINGI LONG NAMBIS...

(Hi!) MI SILIP LONG HIA!

LONG NAIT HAIWARA IKAM NA KARIM DINGI I GO AUT LONG BIK OSEN...

MONING NAU TORO I KIRAP NA PAINIM OLSEM PLES BILONG EM I NO MOA STAP...

AIVOO! MARIA! PLES I GO WEZ!

SAIKLON MAS KAM NA RAUKIM PLES YAHZ!!

EM TING OLSEM SAIKLON IKAM NA PAOSIM PLES NA EM TASOL I SONAIV...

NIUGINI AILAN NIUS

Namatanai Open rikaun bai kamap long Me 5

VERONICA HATUTASI i raitim

RIKAUN o kaunim bek ol 1997 vot pepa bilong Namatanai Open insait long Nu Ailan provins bai kamap long Me 5, Ilektorel Komisins opis i tok.

Deputi Ilektorel Komisina Andrew Trawen i tok ol bai wokim rikaun long Kavieng.

Rikaun ya i kamap bihainim ileksen petisen egensim nau memba Ephraim Apelis we foma Praim Minista na memba bilong Namatanai Open Sir Julius Chan i bin putim long kot las yia. Em bin putim samting ya long kot bikos em i tok sampela paul pasin i bin kamap na em i lus long 1997 Nesanel Ileksen.

Long las wik Nesanel Kot i bin harim petisen na em (Kot) i bin odaim Ilektorel Komisins long kari-



• Ol liklik mangi i amamas na pilal arere long Bay-side nambis long Kimbe.

maut rikaun.

Pastaim Sir Julius i bin gat 10-pela toktok egens long petisen tasol kot i bin rausim faivpela na lusim faivpela i stap.

Kot i bin lukluk long faivpela tok-tok egens bilong Sir Julius na em i rausim tupela na lusim tasol tripela long en. Em i lukluk long dispela tripela na i tok i gat evidens long ol na em i odaim Ilektorel Komisins long karim rikaun long en.

Tripela toktok em long rausim ol waslain sapota (skrutinia) bilong Sir Julius long ples bilong holim vot, pasin i no stret i bin kamap long taim bilong kaunim vot na larim ol yangpela anda ej o kris-mas bilong ol i no inap long vot na ol i vot.

Mista Trawen i tok bihain long rikaun, kot yet bai glasim na skelim sapos bai ileksen i kamap.

Bikpela mekimsave long ol pablik sevan i paulim mani

WALTER DARIUS i raitim

OL PABLIK sevan husat i gat wok long kisim sevis i go long ol pipel aninit long nupela gavman rifom tasol ol save paulim mani i mas sem na daunim het bilong ol, Is Nu Briten Provinsel Plis Komanda Superintenden Ephraim Tomonmon i tok.

Superintenden Tomonmon i bin tok em bai autim nem na givim bikpela mekim save long ol pablik sevan na ol arapela lida husat i holim ol bikpela wok tasol ol save bagarapim luksave we ol pipel i givim bilong pulapim poket bilong ol.

Mista Tomonmon i tok ol dispela kain pipel i save stapim ol wok developmen na ol gavman sevis i go long ol pipel insait long ol ples.

Em i tok gavman i save baim ol pablik sevan na ol lida long kisim ol sevis i go long ol pipel na

ol noken mas yusim posisen long pulapim poket taim ol pipel i go bagarap na i no kisim gut ol sevis.

Komanda Tomunmun i wokim ol dispela toktok bihainim ol kriminel wok na pasin bilong paulim mani i kamap bikpela long ol Lokol Level Gavman level insait long Is Nu Briten provins.

Em i tok Bitapaka LLG i lusim planti tausen kina na dispela ol mani ya i bilong i no no yusim mani long stretpela pasin long ol wok we ol sapos long yusim mani long en.

Komanda Tomunmun i tokaut olsem wanpela man i marit i go long kuskus bilong Bitapaka LLG i kisim sikspela sas long stilim K27,776 bilong gavman.

Em i kolim nem bilong man i paulim mani long Terry Kuru husat i gat 35 krismas. Em i bilong ples Loliang long Musau Ailan insait long Nu Ailan provins.

Komanda Tomunmun i tok Mista Kuru na meri bilong em Rosina Kuru husat i wok olsem kuskus long Bitapaka LLG i pasim toktok long wokim stil pasin ya na rot ol i wokim dispela em long resim sekmani long nem bilong man bilong en.

Em bin tok Rosina Kuru na narapela opisa moa Tom Kakavi i kisim sas tu long wokim stil-pasin.

Em i tok narapela opisa moa i binn kisim sas long wokim giam pasin na stilim moa long K18,000 long Bitapaka LLG. Nem bilong opisa em long Alfred Pupia. Em bin yusim dispela mani long baim olpela ka bilong gavman we ol bin putim long tenda.

Mista Tomonmon i tok i nogat ples long pablik sevis long ol kain pipel na plis bai i no inap isi long givim ol mekimsave. na ol yet bai kisim hevi long pasin nogut bilong ol.

Is na Wes Nu Briten bai ileksen pulim planti kendidet

TWENTI siks kendidet olgeta i putim nem bilong ol long sanap long Is Na Wes Nu Briten bai ileksen we bai kamap long mun Jun long dispela yia.

Naintin-pela kendidet i sanap long resis bilong sia long Wes Nu Briten rijinel we leit Bernard Vogae i bin lusim taim em i dai long tupela mun i go pinis.

Na sevenpela i sanap resis long Gesel Open sia insait long Is Nu Briten we Nakikus Konga i bin lusim taim em i risain tripela wik i go pinis.

Ilektorel Komisins opis i autim nem bilong sampela ol bikman husat i resis long Wes Nu Briten rijinel olsem Andrew Posai foma nesanel Kendrien/Glostta memba, Gabriel Bakani foma memba bilong Talasea, Isidore Teli Deputi na Ekting Gavana, Joe Tauvasa foma Seketeri bilong Sivil Eviesen na manesa bilong Air Niugini, David Sui, foma primia Robert Lawrence, Vincent Ulileo, Sebulon Kulu, Isikar Matage, Patrick Mavihi, Elvis Matthies, John Dako,

Alois lavu, Leo Ruru, John Lunga, Urban Giru, Mathew Pokia na Herman Makele.

Sampela long ol bikman husat i resis long Gesel Open sia em long foma primia Sinai Braun, Vincent Toliman wanpela bikman na pikinini bilong leit nesanel memba Mathias Toliman, Binam Kakap, James Anjo, Henry Ningo, Stanis Ligor na Ereman Tomete.

Ol bai ileksen bai i kisim tupela wik. Ol bai stat long Jun 3 na pinis long Jun 17.

Deputi Ilektorel Komisina Andrew Trawen i tok 20-pela grup bai karimaut aut ol bai ileksen wok long Is na 24 long Wes Nu Briten.

Ol bai yusim ol pablik sevan long karimaut dispela wok.

Mista Trawen i tok long Wes Nu Briten ol bai kariamut pailot projek bikos long wankain taim tu ol i kisim nem bilong ol vota, ol bai sekim ol na rekotim ol nupela nem bilong putim insait long rekot bilong Sensus 2000.



Bogenvil sapatim Loloata Agrimen

NAMBA foa raun bilong Bogenvil tok-tok long mun Me bai i lukluk strong long otonomi o moa pawa, Bogenvil Pipels Kongres (BPC) i tok.

Kongres i tok tu olsem em i laikim ol wok redi long otonomi i mas redi pinis long mun Oktoba long dispela yia.

Kongres i bin bung long Arawa las wik Fraide na ol bin oraitim Loloata Andastending na ol samting we i kam aninit long en.

Kongres i bin tok oraitim tu Yunaitet Nesens Obseva Misin long stap insait long ol narapela toktok we bai ol Bogenvil na Nesanel Gavman lida i kamapim long ol taim i kam.

Long wankain taim tu BPC na ol strongpela BRA lida na sapota i sapatim Loloata Andastending.

Strongpela BRA lida David Sisito i tok ol BRA i amamas long harim olsem Nesanel Gavman bai lukluk long holim referendum long independen bilong ailan.

Mista Sisito i bin tok dispela luksave bilong Nesanel gavman i strongim wok bilong painim gutpela sindaun long Bogenvil.

Long las wik Fonde, Palamen i bin luksave long Ministeriel Stetmen bilong Bogenvil Afeas Minista Sir


Michael Somare. Bihain long em i givim 15 pes stetmen, Palamen i bin wokim na tromoi ol toktok i sut long Bogenvil klostu long sikspela awa olgeta.

Taim Sir Michael na haus i luksave long givim moa pawa long Bogenvil, Sir Michael i tok ol mas wokim dispela samting bihainim mama lo bilong kantri.


Em bin tok tu olsem sampela samting i mas kamap bipo long politkel setelmen long Bogenvil i kamap na dispela em long ol pait grup i lusim ol samting bilong pait, sivil atoriti olsem ol plis, jastis, lo na oda i mas stap na wok gut long ailan na pablik i mas gat fridom long toktok, holim ileksen na vot.

Em i tok tu olsem wok long painim gutpela sindaun bai no go gut inap long ol pipel i lukim ol kaikai bilong em long ol gavman sevis i go long ol, ol rot, skul, haus sik i kamap na ol samting bilong kisim mani long en na ol arapela wok developmen i go het.

Sir Michael i bin tok Loloata Andastending em i rot we bai ol pipel na lida bilong Bogenvil na Nesanel Gavman bai wok aninit long en long helpim wok long painim gutpela sindaun long ailan.



SEPIK NIUS



EU laik kamapim eko-forestri long Sepik

ADAM ELLIOT i raitim

WANPELA mausman bilong Yuropien Yunien (EU) i bin go long Aitape long sekim sapos em i orait long skruim wok bilong eko-forestri program i go insait long Sandaun provins eria.

Gary Thomas i lusim Kimbe, we em i wok long ol eko-forestri projek, na i go long Aitape. Faiv yia projek em i wok long em long dispela taim long Wes Niu Briten bai pinis long Septemba na em i lukluk long kisim tim bilong em i go long Sepik eria.

Mista Thomas i bin go long Aitape bihainim askim i kam long Cosmas Makamet husat i menesim konsevesen program long Santu Anna somil. Mista Makamet i tok lokol program i mas gat moa risos.

"EU i traim long skruim eko-forestri projek bilong ol long ol ailan rijon i kam long bikples Papua Niugini. Mista Thomas i kam hia long mekim liklik wok painim long wanem ol risos yumi gat, wanem ol program i stap pinis na sapos i gat rot bilong EU program i go insait long Sepik rijon."

"Dispela konsevesen program i bin stap long wanpla yia na insait long dispela taim, mipela i bin kisim planti askim i kam long ol papagraun. Mipela i no gat mani o teknikel save long helpim ol olsem na mipela i hop EU i kam insait," Mista Makamet i tok.

Em i tok dispela tupela ogenaisesen i ken wok bung wantaim long helpim ol pipel. Em i tok dispela rot bai i gat tripela lain i wok bung wan-

taim, ol papagraun, konsevesen program na EU insait long eko-forestri long Sandaun provins.

Em i tok ol papagraun i ken givim ol risos bilong ol na redi long mekim wok, Santu Anna i ken givim lokol sapat na bekap na EU i ken givim save na intanesenel netwok.

Mista Makamet i tok bikpela astingting bilong EU projek na konsevesen program em long kamapim wanpela program bilong komyuniti developmen we i ken stap longpela taim.

Insait long las 12-pela mun Mista Makamet wantaim ol wok man long Santu Anna somil i bin wok long kamapim gutpela wanbel pasin wantaim ol grup bilong ol papagraun na kamapim ol asosiesen. Sampela i stat long mekim timba wantaim wok-abaut somil.

Ol i salim ol dispela timba long lokol maket long Aitape. I kam inap nau planti lain i laikim timba tasol i nogat inap timba. Mista Makamet i tok EU i program i strongim wok bilong Santu Anna konsevesen program na ol risos dispela tupela ogenaisesen i gat bai helpim ol papagraun na skruim dispela program.

"EU i gat wanpela gutpela intanesenel timba maket netwok," Mista Makamet i tok, "Ol i gat gutpela teknikel menesmen sapat na ol i save givim gutpela projek."

Em i tok ol projek bai ron i stap long faiv o 6-pela yia.

"Mi ting bihain long dispela, ol EU i laikim ol lokol ogenaisesen long mekim wok long ol yet," Mista Makamet i tok.

Tekwie laikim Palamen tok-tok long Free Trade Zone

WENCESLAUS MAGUN i raitim

GAVANA bilong Sandaun John Tekwie i askim Gavman long toktok long bil bilong Free Trade zone kwik bai em i ken go het long kamapim driman bilong em long Sandaun provins.

Em i askim tu Gavman long helpim provinsel gavman bilong em long K1 milien bai em i ken karim aut sampela wok bilong kirapim Free Trade Zone.

Gavana Tekwie i askim tu Gavman long helpim provinsel gavman bilong em long kisim K60 milien long AusAid bilong skruim ol wok bilong restoren long Aitape we tsunami i bin bagarapim planti ol ples long wes kos na kilim moa long 2000 pipel long 1998.

Sir Mekere i tok Gavman bilong em i no gat asua bilong i no toktok long Free Trade Zone bil long wanem gavman bilong em i kisim opis 7-pela mun tasol. Long askim bilong K1 milien em i tok Gavman bilong em i redi long givim dispela mani tasol em bai

amamas long lukim olgeta ripot bilong wanem as Sandaun i laikim dispela mani.

Sir Mekere i tok em i no save long tingting bilong Gavana Tekwie long kisim K60 milien long AusAid bilong skruim ol wok bilong restoren long Aitape olsem na em i no inap mekim wanpela tok promis olsem Gavman bai givim helpim.

Tasol em i tok Gavman i redi long helpim Sandaun sapos Gavana Tekwie i soim em ol ripot, plen na tingting bilong Sandaun provinsel gavman long ol dispela eria.

Tras fan bai baim hap skul fi

MOA long 1000 pikinini bikpela solwara sunami i bin bagarapim ples bilong ol long Julai 17, 1998, bai kisim helpim long wanpela tras fan.

Aitape Daiosis Rihabilitesen Komiti i opim wanpela tras fan bilong baim skul fi bilong ol dispela pikinini.

Dispela tras fan bai baim hap skul fi long olgeta sumatin i go inap long hai skul. Long ol komyuniti skul, dispela tras fan bai baim K25.

Dispela tras fan bai helpim tu ol sumatin i go long ol vokesenel skul.

Siaman bilong Aitape Daiosis Rihabilitesen Komiti, Tas Maketu i tok long namba wan de bilong disasta ol i bin luksave olsem ol pikinini i bin bungim bikpela hevi long kisim skul.

"Ol pikinini i kisim gutpela save bai kamapim gutpela komyuniti long bihain taim na dispela em wanpela we bilong lukim olsem sindaun long bihain taim bai kamapim gutpela long olgeta nupela ples," Mista Maketu i tok.

Em i tok em i no wari ol skul pikinini i go long wanem skul tasol famili bilong ol i bin bungim hevi bilong sunami.

Bai i gat wanpela bod ov trasti husat bai lukautim dispela tras fan. Ol lain i stap insait long dispela bod ov trasti em, Bisop bilong Aitape, Aitape Distrik Edukesen Menesa, Katolik Edukesen Sekreteri, tupela hai skul het masta bilong Aitape na

ol mausman i kam long ol komyuniti skul insait long sunami eria.

Bai i gat kibung long wan wan yia bilong ol bod ov trasti long paitim toktok long skelim mani i go long baim skul fi bilong wan wan skul pikinini.

Sunami eria rot i bagarap yet

Rihabilitesen Komiti bilong Aitape Daiosis i peim gen narapela hap mani bilong karimaut ol rot wok long go long ol ples we sunami i bin bagarapim long sentrel nambis eria bilong Sandaun.

Wantok i no kisim mak bilong mani we komiti i tromoim long ol projek tasol em i peim long karimaut ol wok bilong stretim bris long Pes rot long Poitulul na narapela long Malol Wara long Yakoi we i stap faivpela kilomita long Aitape.

Ol papagraun i bin kros na blokim Malol na Pes rot we i save go olsem long ol ples we sunami i bin bagarapim. Dispela em bikos provinsel na lokol gavman i no karimaut ol ripea wok long ol rot ya.

Long wanpela wik, ol lain i wok long rot i no bin kisim ol saplai bilong wokim ol haus long nupela ples we ol i wokim aninit long rihabilitesen program. Tasol wok long sanapim ol haus long ples i klostu pinis.

Siaman bilong rihabilitesen komiti Tas Maketu i tok komiti i peim mani long dispela wok i go

het bihain long ol i stretim toktok wantaim provinsel na Lokol Level gavman. Na ol i bin tok olsem ol i gat hevi long mani na ol buk bilong ol i pas.

Mista Maketu i tok ol palamen memba bilong ol i feil long givim sapat long ol wok bilong stretim ol rot.

Em bin tok ol bin askim ol long givim hap mani tasol ol no givim ol wanpela samting.

Wanpela lokol kontrakta we Woks Dipatmen bai supavaisim bai karimaut ol rot wok long Yakoi.

Narapela bikpela rot we i save go long ol sunami eria em dispela we i save go olsem long Pes. Las yia wanpela trak we i karimaut rot mentenens i bin kapsait i go daun long Ramgate wara na bagarapim bris ya.

Ol ples lain i bin belhat na ol yet i bin stretim na nau ol i save sasim K10 long wanpela ka i yusim dispela bris. Bikos provinsel gavman i no bin mekim samting long stretim bris, Aitape Rihabilitesen Komiti i bin stretim gut bris na opim bek gen.

Hevi nau i stap long Pes rot. Maski komiti i tromoim bikpela mani long karimaut ol wok mentenens long en, long tupela krismas, rot ya i bungim hevi bikos Wara Yalingi i save senisim rot bilong em na bagarapim Pes rot. Na maski ol wok long stretim rot i save kamap, em i save bagarap gen na olsem hevi i stap.

Santu Joseph selebretim pestode wantaim stail

SANTU Joseph Komyuniti Skul long Pes i bin selebretim Santu Joseph pestode wantaim stail wantaim de bilong amamas long ol sumatin na ol famili bilong ol.

Hetmasta bilong Santu Joseph Komyuniti Skul, Karlous Lausep i tok, Mas 28 em i bikpela de long ol tisa na ol sumatin bikos em i de ol i ken givim rispek longwas santu bilong skul bilong ol.

"Long skul bilong mipela, mipela i save wok aninit long lukaut bilong

Santu Joseph," Mista Lausep i tok, "Dispela em i pestode bilong em olsem na em i bikpela samting long yusim dispela taim long singautim olgeta lain i kam bung wantaim na mekim samting long onaim em."

Pes i stap olsem 20 kilomita wes long Aitape. I gat 284 sumatin long Santu Joseph, wanpela bilong ol nupela top-ap skul, i gat gred tu i go long gred seven.

Mista Lausep i tok ol i bin amamasim dispela de gut tru.


Morobeen
BEEF CRACKERS

IGAT kick!

HEPI BIRTHDAY

25% MORE

5 BISKETS INSIDE - 1 FREE



Ol papagraun wetim Len Taitels Komisin

Full bens bilong Lens Taitel Komisin bai tokaut long dispela wik husat tru i papa blong ol graun we kampani i painim wel long en long hap bilong Saten Hailans.

Lens Taitel Komisin, Misis Josepha Kanawi wantaim lain bilong em bai i bung wantaim ol papagraun na skelim disepa kot bilong graun.

Dispela kot i kamap long opis long Dipatmen bilong Ateni Jeneral long Mosbi.

Dispela kot bilong graun namel long ol aspl'es i stap insap etpela yia olgeta nau. Dispela graun i karamapim Gobe. Sait Gobe wel fil ma ol graun i stap long hap bilong Saten Hailans na Galp Provins em imap long mak bilong 1,082 skwea

kilomita.

I gat foapela bikpela hap graun em ol 15 wanpisin i wok long paitim toktok long en. Ol dispela graun em Samberigi Veli, Kutubu Wel Paiplain, Agogo Gap, Gobe main na Is Gobe Welfil na Mubi Riva het i go inap long Agogo Gap.

Dispela bikpela eria i karamapim plis maunten, ol tais na wara. Planti

ol pipel i stap long Samberigi Veli. Na ol pipel bilong Samberigi, Kaiam ma Baina i wok long pulim na taitim nau toktok long graun.

I bin gat 15 apliken i salensim disisen bilong Jastis Gibs Salika na askim kot long skelim gen. Misis Kanawi i tok ol lain komisin bilong em bai skelim ol toktok i go

inap long pinis bilong wik.

Ol 13 wanpisin insait long dispela kot i kisim seven lo kampani long makim ol long dispela kot. Kot i bin stat long Me 1997 na Lens Taitel Komisin i bin go raun na lukluk long graun em 11-pela wanpisin i tok i bilong ol, long Oktoba 1999.

Berina-Malalau rot i wetim Sir Mekere

GAVMAN i senis gen taim bilong opim Bereina-Malalau rot inap Praim Minista Sir Mekere Morauta i kam bek long Japan. Dispela toksave i kam long opis bilong Woks Minista, Alfred Pogo.

Dispela bikpela rot namel long Sentral Provins na Galp Provins i bin pinis na ol i

makim 18 Epril olsem de bilong opim. Tasol opis bilong minista i kisim toksave olsem Praim

Minista bai i noainap stap long kantri long dispela taim.

Praim Minista Sir Mekere i go long wanpela bikpela bung bilong ol wol lida long Japan. Em bai kam bek gen lomng

kantri long April 26 na bai em i opim dispela rot.

Mista Pogo i tok em i save olsem planti pipel bilong Galp na Sentral Provins i redi long amamasim dispela bikpela de bilong rot i op. Na em i tok sori olsem bai ol i mas wet inap Sir Meker i kam bek na bai em i opim dispela rot.



• Tripela memba bilong sinia gret kias bling Gordon IEA skul i silip malolo long grass bihain tasol long ol i wokim tripela laps long Pot Mosbi Golf Klub last Fride. Foto: Issac Ikuavi.

Lo na Oda Komiti i strongim wok long Oro

Oro Provinsal Lo na Oda Komiti i kirapim gen wok bilong em na namba wan toksave bilong en em long kirapim gutpela sindaun namel long ol bisnis na komynit long Popondeta.

Ol lain i go pas long dispela komiti em ekting edministrerta, Ken Noga, Provinsal Plis Komanda Paul Monama na ol mausman bilong ol bisnis Peter Seeto, Bill Dry, John Atkins na Timothy Titipu, senia mejistret Virjil Tivekuri,

mausman bilong ol sios Fr Shelby Tangara, Pasto OSwald Tamanabae, mausman bilong ol yut, Fr Cameron, Evalyn Pukari husat i makim ol meri na Arthur Jowadimbari na Pius Konainai husat i makim komyniti.

Progrem i stat long ples Kakandetta na las wil komiti i raun long faipela kaunsil wod long toksve long progrem bilong en.

Astingting bilong dispela progrem em long mekim ol pipel i skelim pasin bilong komyni na painim rot bilong abrusim ol birua na trabel i wok long kamap na bagarapim nem bilong provins.

Ol bikman husat i kamap na toktok long bung long ples Kakandetta em meya bilong Popondeta taun, provinsal plis komanda, Fr Shelby Tangara, Timothy Titipu na senia kot mejistret.

Ol meri Oro kisim skul long kredit skim

SAMPELA meri long Oro Provins i kisim skul pinis long pasin bilong mekim ol wok projek. Insait long dispela wan wik kos ol i bin skul long wok bilong kredit skim.

Dispela kos bilong ol meri insait long wan wan Lokal Level Gavman i bilong kisim save long kredit skim.

Dipatmen bilong Hom Afeas i givim K40,000 long statim dispela kredit skim long Oro Provinsal Kaunsil

bilong ol Meri long 1996 aninit long Meri Dinau Agrimen.

Dipatmen i bin kisim dispela mani long dinau progrem long Wol Beng long helpim ol meri long papua Niugini long statim ol liklik bisnis bilong ol.

Dipatmen ov Home Afeas i bin skelim mani i go long wan wan provins na Oro i bin kisim K40,000. Ol i brukim mani na givim K20,000 i go long Sohe and Ijivitari long helpim ol liklik projek bilong ol meri.

Presiden bilong Oro Provinsal Kaunsil ov Wimen, Olive Bunari i tok, aninit long dispela skim, ol meri i mas bekim mani wantaim 8 pesen intres.

Em i tok i tru olsem ol i kisim mani long 1996 tasol ol i no gat mani long givim trening long ol meri long pasin bilong yusim kredit skim olsem bai ol mneri i ken kisim dinau na kirapim ol projek bilong ol.

Greenpeace i tokaut long ripot bilong sainad

OL SAINTIS bilong Greenpeace i tokaut olsem ol pipel husat i stap long ples we poisin ol i kolim sainad i bin kapsait long en i no ken wari bikos i no gat bikpela birua i kamap. Tasol Greenpeace i tok tu olsem Dome Resources i no pinisim wok bilong en long klinim dispela eria.

Greenpeace i mekim dispela toksave bihain long ol saintis i go sekap long ol ples long hap bilong Tolokuma long

Sentral Provins.

Dispela poisin i kolim sainad i bin pundaun taim helikopta i karim kago i go long Tolokuma main we kampani ol i kolim Dome Resources i wok long painim gol.

Bihain long dispela birua i kamap, Dome Resources i toksave long ol asples long no ken dring wara na kisim ol kaikai i stap long dispela hap inap ol saintis i mekim wok painimaut.

Dome Resources yet i


bin salim ol wokman i go nsait na ol i painim ol dispela marasin na bihain ol i tokaut olsem ol samting i orait. Tasol ol asples i askim Greenpeace tu long go insait na sekam na testim gut ol wara na graun pastaim bipes long ol pipel i ken yusim gen ol dispela samting.

Greenpeace bai bung wantaim ol lain bilong Dome resource long dispela wik.

<p>Sunshine Liquid Milk 1 litre K1.50</p> <p>Roots Rice 1kg K1.27</p> <p>Bushells Tea Bags 25 K1.07</p> <p>Suncrush Cordial 750ml K1.81</p> <p>Ramu Sugar 1Kg K2.34</p> <p>Steelo Steel Wool 5 K1.18</p>		<p>Bluebird Sardines 425gr K 1.95</p> <p>Gold Nuggets 25gr K0.30</p> <p>Arrow Delta Choc. 150gr K1.25</p> <p>Globe Curry Chicken 300gr K2.70</p> <p>Weet Bix 375gr K3.90</p> <p>Mothers Choice Flour 1Kg K1.20</p>
---	--	--

Planti moa kaikai prais i go daun long en!


Ph: 325 7566, 325 0863 Fax: 325 7096



HAILANS



NIUS



Agiru laikim gavman long givim garenti long rot

JOE KANEKANE i raitim

GAVANA bilong Sauten Hailens Anderson Agiru i askim gavman long hariapim dispela garenti i go long provinsel gavman olsem ol i ken paim bek dinau mani bilong ol olsem bai wok i ken stat long putim ta namel long Mendi na Lake Kapiago.

Mista Agiru i tok gavman i kisim longpela taim tumas long kamapim tingting bilong em na ol pipel wantaim provinsel gavman i weit long pela taim long kisim wanpela bekim.

"Klostu ten pela mun nau mipela weitim gavman long givim garenti long wokim dispela rot tasol gavman i no kam bek long mipela long dispela askim. Dispela rot bai halivim planti ol pipel na tu long ol bikpela prosek insait long dispela hap," mista Agiru i tok.

Em i tok gavman i bin tok nogat long Gulf-Sauten Hailens haiwei na dispela i mekim provinsel gavman i kisim bikpela hevi na ol i bin was long dispela prosek tasol gavman i wok long surukim taim.

Mista Agiru i tok olgeta pepa long opis bilong Stet Solisita, Woks dipatmen i redi pinis na provinsel gavman tu i redim olgeta samting long sait bilong em.

"Mipela yet i kisim pinis K10 milien olsem mak bilong mipela na mipela askim gavman long halivim mipela long kisim narapela K50 milien long pinisim dispela prosek," em i tok.

Mista Agiru i tok Sauten Hailens provinsel gavman i save pulim K450 milien kina long wan wan yia i go insait long nesenol baset bilong kantri insait long planti yia olgeta tasol gavman i no save kirapim wan-

pela bikpela prosek long provins.

Em i tok tu olsem gavman i save askim olgeta toktok i save stap long ol agrimen we dispela tupela lain i save sainim na nau em i taim bilong gavan long luk-save olsem wanem samting ol wokim i mas bihainim dispela agrimen.

"Longpela taim nau long provins mipela i gat ol prosek olsem Hides Gas, Kutubu na narapela prosek tasol nesenol gavman i no save putim wanpela bikpela prosek i go bek long provins," mista Agiru i tok.

Em i tok ol i givim gavman inap long Julai long kamap wantaim tingting bilong em sapos ol bai halivim o nogat.

"Mipela i no laik kros pait wantaim gavman long wanpela samting em bilong mipela.

Gavman i mas luksave long tingting bilong mipela na givim garenti olsem bai wok i ken stat hariap," mista Agiru i tok.

Buai dia tumas long Hagen



• Michael Law (lephan) bilong Holi Trinita Tisa Kolis na Timothy Aims (name) i sanap toktok na kaikai buai long get bilong tisa kolis. Foto: TIMOTHY AIMS.

TIMOTHY AIMS i raitim

OLLAIN husat i save kaikai buai long Hagen bai kislum taim bikos pe bilong buai i go antap.

Kalakai buai maket i wok long salim wanpela buai long 50 na 60 toea.

Michael Law wanpela sumatin long Holi Trinita Tisa Kolis long Hagen

husat i save kaikai buai i tok ol lain bilong salim buai long Hailans i save bihainim ol maket prais na makim prais long ol buai.

Mista Law i tok planti manmeri long Hailans i save kaikai buai.

Mak bilong ol kaikai buai lain long rijen em 60 pesen.

Mista Law i tok ol lain i salim buai i sasim 50 toea na antap long wan wan buai.

Haiwe PMV i sasim fea long laik

SAPE METTA i raitim

SAPOS yu wanpela man o meri i save yusim PMV na ron i go i kam long haiwe namel long Goroka na Lae, ating bai yu paul liklik long wanem i gat kainkain sas em ol lain husat i save ronim PMV is save sasim.

Na dispela i kamapim planti komplek i kamapim planti komplek i kam long ol pablik husat i save ron long ol PMV bas na ka.

Wanpela long ol dispela man husat i komplek em Alung Ruben husat i save i stap long Goroka na i save yusim PMV na ron i go i kam long Lae.

Mista Ruben husat i asples man bilong Salamaua klostu long Lae siti i tok em i no wanbel na amamas long ol PMV i sasim ol pasindia long laik.

Em i tok ol PMV i nogat mak stret bilong sasim ol pasindia olsem na ol i wok long sasim kainkain sas long laik olsem K12, K13, K14 na K15.00. Dispela em i wan we sas bilong Goroka na Lae Mista Ruben i tok dispela em i wanpela hevi we ol PMV i wok long paulim ol manmeri i go i kam.

Em i sutim tok nau i go long ol Lens Trensport Bod long i no mekim klia ol sas bilong PMV long ol pablik Lens Trensport Bod i mas lukluk na stretim dispela hevi so ol man na meri i ken save long mak stret bilong baim fea bilong ol aim ol i yusim haiwe long ron i go i kam," Mista Ruben i tok.

Gavana Lak lukluk raun long ples

WESTEN Hailens gavana Pater Robert Lak i bin wokim wanpela tripela wik lukluk raun i go long olgeta distrik long ples bilong em.

Long dispela lukluk raun Pater Lak i laik glasim gut sapos ol dispela Vision 2020 progrem bilong em i wok long kamap gut long ol ples na em yet i laik luksave sapos sampela hevi i wok long bungim ol pipel bilong em.

"Dispela lukluk raun i gutpela tru long wanem bai mi ken glasim gut ol wok i wok long kamap long dispela ol ples. Wantaim dispela bai mi ken painimaut tu sapos dispela ol ples i bungim sampela hevi tu," Pater Lak i tok.

Long dispela lukluk raun bilong em, em i bin bung wantaim ol kansol, vilis kot magistret, na sidaun wantaim ol na glasim ol wok namel long ol.

"Mi bilip olsem dispela wok lukluk raun bai soim ol pipel olsem mi gat tingting long ol pipel long dispela ol

hap na wanem wok ol wokim i mas stap insait long mak bilong 2020," Pater Lak i tok.

Taim em i raun em i tokim ol Lokel Level gavman bilong em olsem ol i mas gat olgeta distrik plen bilong ol long bihainim dispela mak bilong 2020 plen long wanem gavman i bai sambai tasol long dispela plen na wanem samting i no bihainim dispela plen tasol.

"Wokim plen em wanpela bikpela samting insait long wol na olgeta taim i mas gat plen long wokim wok. Olgeta Lokel Level gavman i mas holim plen bilong ol i sambai i stap na bungim dispela wantaim tingting bilong provinsel gavman," Pater Lak i tok.

Em i apim nem bilong Nebilyer Loke Level gavman long gutpela pasin bilong ol long kamapim plen bilong ol na em i askim ol narapela LLG long lukim dispela kain pasin na bihainim ol.



Orogen Minerals Limited

ENUEL MITING

Toksave i go olsem Enuel Miting bilong ol memba bilong Orogen Minerals Limited bai kamap long Pot Mosbi Parkroyal Hotel, Pot Mosbi long Tunde, Mei 2, 2000 long 9.00 am moning

MICHAEL UIARI
Company Secretary



MADANG NIUS



Madang nius wantaim WENCESLAUS MAGUN

Paul pasin lukim saspensen bilong edukesen bod

MADANG Provinsel Eksekutiv Kaunsel (PEC) i saspensim Madang Provinsel Eksekutiv Bod (PEB) long Sarere bilong wik i go pinis.

Siaman bilong Madang Provinsel Edukesen Bod na memba bilong Raikos Stahl Musa i tokim Wantok olsem astingting bilong saspensim PEB em bikos i gat planti paul pasin i kamap.

Mista Musa i tok PEC i kamapim wanpela komisen bilong inkwairi bilong glasim ol toktok bilong wantok sistem, paul pasin, Provinsel Edukesen brens i no mekim gut wok.

Em i tok planti ol pipel bilong Madang i bin mekim planti komplek long wok bilong ol opisa insait long Provinsel Edukesen brens we i bin mekim wok bilong edukesen sevis insait long provins i bin bagarap.

Sampela ol toktok Provinsel Edukesen brens i karim tok long en i olsem:

- Hevi bilong lukautim mani;
- Nogat gutpela level bilong kodinesen bilong ol tisa;
- Ol i no givim gutpela edvais long Madang Provinsel Gavman; na
- PEB i no mekim gut wok bilong edukesen divisen.

Madang PEC i makim Deputi Edministreta olsem saiman bilong Komisen bilong Inkwairi. Ol tripela arapela memba bilong dispela Komisen em Intenel Odita, Edvaisa bilong pesenel menesmen divisen na provinsel tresera.

Madang Provinsel Edministresen bai putim mani i go insait long Komisen bilong Inkwairi long karim aut dispela wok painim.

Ombudsmen painim Kas i gat asua liklik

OMBUDSMEN Komisen i putim Gavana bilong Madang, Jim Kas long han bilong Pablik Prosekyuta Cronox Manek long kotim em long i no mekim gut wok.

Ombudsmen Komisen i bin putim Gavana Kas i go long han bilong Pablik Prosekyuta long 12 April.

Pas i kam long Wantok i tok Ombudsmen Komisen i painim olsem Mista Kas i no bin mekim gut wok bilong em long Opis bilong Gavana bihainim wanpela hevi i kamap long Madang ples balus long 1998.

Pas i kam long Ombudsmen Komisen i bin putim Mista Kas i go long han bilong Pablik Prosekyuta long 12 April.

Lidasip Kod na Ogenik Lo long ol Duti na wok bilong ol Lida i karamapim."

Mista Pentanu i tok Ombudsmen Komisen i bin karim aut wanpela wok painim i go insait long wok bilong Mista Kas, na i givim tok orait long Mista Kas long autim tingting bilong em long dispela toktok.

Pas bilong Mista Pentanu i tok "there is prima-facie case that Mr kas has been guilty of misconduct in office," o i min olsem Mista Kas i gat toktok bilong i no mekim gut wok bilong em long opis bilong Gavana.

Loya bilong Mista Kas, Greg Shephard i no bin stap long opis long bekim sampela askim bilong Wantok.

Kabinet rausim Tomscoll long provinsel asembli

MADANG kabinet i rausim memba bilong Midel Ramu, Tommy Tomscoll long sindaun insait long provinsel asembli bihain long em i no stap insait long 6-pela asembli kibung.

Wanpela kabinet memba na Siaman bilong Edukesen na Memba bilong Raikos Stahl Musa i tokaut long dispela.

Madang Provinsel Asembli Klak, Jerry Manyir i tok long 23 Mas, Gavana bilong Madang Jim Kas i bin tokim provinsel asembli olsem Madang Provinsel Eksekutiv Kaunsel i bin rausim Mista Tomscoll long sindaun insait long provinsel asembli.

Mista Manyir i tok asembli i no bin save long dispela disisen

bipo long ol i kisim toksave bilong Gavana Kas olsem kabinet i rausim Mista Tomscoll long asembli.

Mista Manyir i tok tu olsem asembli i bin askim sapos Mista Tomscoll i ken kam bek gen na sindaun insait long ol asembli kibung.

Mista Manyir i tok Gavana Kas i bin tokim asembli olsem Mista Tomscoll i ken kam bek gen na sindaun insait long ol asembli kibung sapos em i rait i go long provinsel eksekutiv kaunsel na givim gutpela astingting long wanem as em i no bin stap insait long 6-pela asembli kibung.


Disisen Mista Kas na kabinet bilong em i mekim long rausim Mista Tomscoll long provinsel

asembli em i namba tu taim Madang provinsel gavman i mekim long rausim ol provinsel memba bilong en long stap insait long ol provinsel asembli kibung.

Namba wan taim i bin kamap long 1998, taim Deputi Gavana Pengau Nengo na provinsel eksekutiv kaunsel i bin rausim memba bilong Bogia, Bernard Mollok long sindaun insait long ol provinsel asembli kibung.

Mista Manyir i tok Madang Provinsel Eksekutiv Kaunsel i bin yusim pawa bilong en aninit long Seksen 12 sab seksen tu bilong Ogenik Lo long Provinsel na Lokol Level Gavman long rausim ol provinsel asembli memba long asembli kibung.

Pasin tumbuna stret bilong yumi



• Wanpela singsing grup bilong Karkar Ailan i mekim save long singsing na amamas long Madang taun long opim dispela nupela yia. Foto: MARTIN HAWEK.

Nahu Rawa LLG kisim nupela rot

MEMBA bilong Raikos Stahl Musa i givim K500,000 i go long Nahu Rawa Lokol Level Gavman long kirapim Infrastraksa developmen.

Presiden bilong Nahu Rawa LLG, Muser Akus i tenkim Mista Musa long bikpela helpim Mista Musa i givim ol pipel bilong em.

Em i tok wantaim dispela mani ol i bin kirapim sampela bikpela projek. Wanpela bilong ol dispela projek em rot.

Mista Akus i tok ol dispela rot projek em:

- Ranara/Tauta/Barim rot kisim K100,000;
- Ranara/Gomumu rot kisim K150,000;
- Gomumu/Butemu rot kisim K200,000; na
- Dumpu/Mungou rot i kisim K100,000.

Insait long wok kamap Mista Akus i tok, em i bin kisim tupela kampani i go mekim dispela wok.

"Wanpela kampani em FTM we ol bringim ol masin bilong ol i go mekim wok long Ranara/Gomumu/Butemu rot. Narapela doza em nesinol memba baim long Australia, nau i wok long Ranara/Tauta/Barim rot," Mista Akus i tok.

Kisim save long kuk grup



• Women & Youth in Development, wanpela NGO long Madang i bilong skulim ol meri Madang long kainkain wei bilong kuk.

Austrolabe Bay LLG kisim helpim

I GAT planti developmen projek i kamap pinis long Austrolabe Bay Lokol Level Gavman eria aninit long lukaut bilong presiden bilong Austrolabe Bay LLG Garry Kulonga na nesinol memba Stahl Musa.

Sampela long ol bikpela projek em:

• Bugadjim/Bawak/Yaola rot we i kos K100,000; • Yawar/Tumbu/Saiba rot we i kos K200,000;

• Male/Zilim rot we i kos K50,000;

• Toyota Lend Krusa bilong kaunsel we i kos K50,000;

• Erima Praimeri skul dabol klasrum we i kos K30,000 na ileg gavman stesin pawa jenereta.

Mista Kulonga i tok bikos em i gat gutpela wok bung wantaim nesinol memba Mista Musa, tupela i bringim dispela sevis.

Lae Nius

Voluntia laikim gavman long promotim literesi progrem long kantri

FRANCO NEBAS i raitim

WANPELA voluntia woka bilong Japan i lusim Lae long las wik i go bek long kantri bilong en i tok gavman i mas lukluk moa long promotim literesi progrem insait long ol siti na taun long Papua Niugini.

JICA voluntia woka Koichi Miyabayashi i tok populesen i go bikpela tru we ol setelmen i stap rausnim ol mesa senta long kantri i lukim planti pikinini na bikman meri i no kisim gutpela fomol edukesen.

Mista Miyabayashi i wok wantaim Literesei Aweanes na Metiriels prodaksen (LAMP) senta bilong Morobe Literesei na Elementeri progrem long Lae inap long tupela yia.

Kontrak bilong em i pinis long Tunde las wik na em bin go bek long ples bilong em long Japan.

Mista Koichi tu i bin wokim wanpela niuspepa ol i kolim long "Ritim na Opim Laip" we ol i save salim i go long olgeta kaunsil eria long Morobe provins.

Em i produsim sampela edukesen buk long Tok Pisin olsem "Sel

Buk bilong Elementeri Skul na Stori Tumbuna Buk Wan na Tu.

Long wankain taim yet, ekting Provinsal Progrem etvaise Albert Tsika i tok long LAMP senta progrem bai go het mekim wok we Mista Koichi i lusim i stap long dispela sotpela taim bilong en.

Mista Tsika i tokaut long ol edukesen opisel olsem long liklik bung we ol bin wokim long tok gutbai long Mist Koichi long Malahang Teknikol skul olsem LAMP senta bai kisim ful sapot long Edukesen Divisen bilong Morobe.



• Salamaua komyuniti skul long Morobe provins i wokim tumbuna danis. Foto: Franco Nebas

Opereting tiata long Angau haus sik i pas

TUSA Praivet Haus sik long Lae bai kisim ol siman we i laikim operesen bihainim interim arenjmen namel long Angau haus sik bod na Tusa Haus sik.

Dispela i kamap bikos ea kondisen long opereting tiata long Angau Memoriel Haus sik i bagarap na ol i pasim opereting tiata.

Ol ripot i tok ea kondisen long tiata we ol bin putim 10-pela kris-mas i go pinis taim ol i sanapim haus sik bilding i wok long

bagarap tumas insait long las tripela yia na nau hevi i go nogut na ol i pasim haus sik.

Sief Eksekutyutiv opisa bilong Angau Haus sik Margaret Samei i tok ol wokman long haus sik i bin putim wanpela petisen long pasim haus sik bihainim hevi ya na olsem ol i pasim opereting tiata.

Ol bin tok sistem bai kamapim hevi long sait bilong helt long ol sikman na ol wokman bilong

haus sik.

Long wankain taim tu Angau Haus sik bot na manesmen bilong Helt dipatmen i wok long lukluk long sampela rot bilong traim stretim hevi ya.

Temporeri arerjmen bilong nau em ol imejensi keis sikman we i laikim opresen em ol bai kisim ol i go long Tusa Praivet Haus sik na ol dokta na nes yet bilong Angau bai lukautim na karimaut operesen long ol.



• Skul pikinini long St Michael komyuniti skul long Bulolo. Foto: Franco Nebas.

Ol atoriti long Lae laik painim rot long stretim kalabus hevi

FRANCO NEBAS i raitim

OL ATORITI long Lae i wok long traim miting long painim rot long stretim hevi bilong kalabus i pulap long Buimo.

Hevi bilong Buimo haus kalabus i pulap em ino nupela samting tasol em i stap long longpela taim pinis.

Long las yia ol kalabus i tingting long kamapim wanpela bikpela straik we ol ino inap long kaikai na tu bai brukim haus kalabus na ronawe.

Tasol ol atoriti i bin promisim ol olsem ol bai lukluk long dispela hevi bilong ol tasol diapela i no karim kaikai inap tude.

Dispela i hevi i kamap long planti ol bel aplikesen na ol kot i go inap long yia 1997 we ol kot long Lae i no harim long wanem i nogat inap jas long mekim dispela wok.

Long dispela yia, residen jas bilong Lae Jas Injia i tokaut long dispela hevi bilong nogat inap jas long wokim wok.

Em bin tok long gavman long kisim tupela moa jas i kam stap long Lae long helpim em long ol planti kot i stap yet long Buimo.

Long dispela hevi tasol i wokim na haus kalabus i wok long go moa pulap. Long wankain taim tu ol plis i holim pasim ol man we ol nupela keis i kamap na skruim moa hevi long dispela samting.

Wantok Niuspepa i painimaut olsem sampela long ol dispela kalabus i stap lok long plis sel na dispela i givim het pen long ol plis.

Dispela em ol plis i mas painim mani gen long baim ol kaikai samting bilong ol dispela lain i stap long (plis) sel.

PHONE:
(675) 472-3912

FAX:
(675) 472-3919

IMPACT
SIGNAGE
PNG

Any Size,
Any Shape, Any Amount

- COREFLUTE SIGNS
- METAL SIGNS
- BUMPER STICKERS
- T-SHIRTS
- STUNNY COOLERS
- BILLBOARDS
- BUNTINGS
- POINT OF SALE

FOR ALL YOUR PRINTING NEEDS

P.O. Box 3705, Lee M.P. 411, Papua New Guinea - Email: Impact@global.net.pg

Ista em taim bilong tingim Kraiss husat i dai bikos long ol hevi bilong graun

WENCESLAUS MAGUN I
raitim

ISTA selebresen em i taim ol Kristen i luksave long wanpela man husat i gat bikpela wari long lo na oda, ples i bagarap, na pasin nogut i stap insait long wol na em i mekim wanpela bikpela sakrifais long givim laip bilong em yet, Dokta Kigasung i tok.

"Em i dai long sevim wol na bringim bek oda na givim bek laip long ol lain i bihainim ol skul bilong em long trupela bilip. Em i kamap 'Pikinini bilong Bel isi' long bringim bel isi na gutpela sindaun long wol we i wok long karim planti pen na i bruk bruk long sin pasin bilong manmeri na gridi na long bringim hop na strongim hop long ol pipel i nogat hop na i karim pen i stap," Dokta Kigasung i tok.

Em i tok selebresen bilong Ista em i selebresen bilong kirap bek bilong Lord Jisas Kraiss husat em i 'Rot tru, Tok tru na Laip tru.'

"Yumi selebretim Ista bikos em i strongim bilip na hop bilong yumi long laip. Insait long kirap bek bilong Kraiss, yumi ken selebretim laip na yumi ken stap insait long dispela laip oltaim," Dokta Kigasung i tok. Em i tok, selebresen bilong Ista i givim yumi hop

olsem maski hevi na pen na ol kain kain hevi, ol lain i putim ai bilong ol long Jisas insait long bilip bai painim laip i stap gut oltaim na ekpriansim nupela laip na kisim strong long go het.

"Dispela rot na promis i kamap bilip na strong long yumi long dispela nupela milenium long taim yumi go het olsem wan wan Kristen na olsem ol Sios na olsem ol pipel bilong PNG wantaim ol lida

bilong yumi long lokok level na nesene level na gavman bilong tude," Dokta Kigasung i tok.

Em i tok ol pen na hevi yumi i wok long karim i mas mekim yumi strong na helpim yumi long painim wanpela ansa.

"Lord husat i gat olgeta save na wisdom na strong bai go pas long mipela na lukautim mipela long dispela nupela milenium," Dokta Kigasung i tok.

Asbisop Barnes bai blesim holi wel long Trinde

WANPELA pasin bilong Roman Katolik Sios long olgeta hap bilong graun em long holi wik olsem long Tride bilong dispela wik, ol bisop i save blesim holi wel we ol pater na ol bisop i save yusim long welim ol sik manmeri na pikinini, ol pikinini i long taim bilong baptismo, na long taim ol pater i kisim odinesen.

Dispela kastom i stap yet tude.

Long Mosbi Asdaiosis bai i gat wanpela bikpela santu Misa long Santu Mary Katidrel long daun taun we olgeta pater i wok long dispela asdaiosis bai bung wantaim Asbisop Brian Barnes long selebretim dispela Misa.

Insait long dispela Misa long 5 kilok long Trinde abinun, Asbisop Barnes bai blesim ol dispela holi wel.

Long wankain taim olgeta pater i kamap long dispela Misa bai mekim gen promis bilong ol long mekim gut wok bilong ol

olsem ol pater insait long Katolik Sios long Mosbi Asdaiosis.

Peris pater bilong Santu Mary Katidrel, Pater Rodrigo i askim olgeta Katolik bilip manmeri long kam bung wantaim ol pater long dispela Misa.

Em i tok wanpela we ol Katolik bilip manmeri na pikinini i ken givim sapot bilong ol long ol pater em long kam bung wantaim ol long dispela Misa na kisim bodi na blut bilong Kraiss.

Long Fonde Asbisop Barnes bai go pas tu long narapela Misa long wasim lek bilong ol wok manmeri bilong sios olsem Jisas Kraiss i bin mekim taim em i wasim lek bilong ol aposel long gut Fonde nait 2000 yia i go pinis.

Pater Rodrigo i tok pasin Asbisop Barnes bai mekim taim em i wasim lek bilong sampela ol manmeri, i laik soim olsem ol wok manmeri bilong sios i kam

bilong mekim wok bilong sios na i no kam long kisim pawa na biknem.

Long hap pas 6 (6:30) long Fraide moning Pater Rodrigo i tok bai i gat prosesio bilong rot bilong kruse. Dispela prosesio bai stat long Santu Peter Erima peris na i go long Santu Mary katidrel long taun.

Pater Rodrigo i askim olgeta Katolik bilip manmeri na ol arapela bilip manmeri bilong ol susa sios long bung wantaim na beten long dispela rot bilong kruse.

Em i tok dispela rot bilong kruse em long helpim ol bilip manmeri long sori long sin bilong ol yet, tanim bel na bihainim Jisas Kraiss husat i bin karim bikpela pen, i dai na kirap bek bilong kisim bek yumi.

Bai i gat ol wankain rot bilong kruse prosesio tu long ol arapela daiosis na asdaiosis bilong ol Katolik Sios long PNG.

Taim bilong senis



Maski ples nogut, bilip bilong man i strong na save kamapim wok



Pasin nogut i stapim ol pipel long amamas

I GAT planti pasin nogut long wol tude, dispela i kamapim planti tingting bikos pasin nogut i stapim ol pipel long amamas long laip, we ol i mas, Het Bisop bilong Evanjelikol Sios bilong Papua Niugini, Dokta Wesley Kigasung i tok.

Insait long Ista toktok bilong em, Dokta Kigasung i tok pasin nogut nau i planti as bilong en insait long ol sosaiti bilong PNG.

"I gat planti gridi na mi yet pasin. Ol pipel i bagarapim laip bilong arapela, na olsem i nogat as bilong selebret," Dokta Kigasung i tok.

Em i tok i gat ol samting i wok long kamap nau we i singautim yumi olgeta long lukluk long ol na glasim gut ol pasin, tingting, toktok, na pasin bilong yumi na ol arapela pipel i stap wantaim yumi.

"Pasin bilong bagarapim bus, graun, wara, solwara, welabus, pisin, pis, na ol samting bilong ol we i save givim kaikai na lukautim yumi long stap laip. Na olsem yumi mas kisim taim long lukluk i go insait long pasin bilong bagarapim laip na traim long painim rot bilong stretim," Dokta Kigasung i tok.

Em i tok sampela ol hevi we i save bagarapim laip em ol pipel yet i save mekim asua na pipel i givim baksait na i no laik harim tok lukaut we ol arapela pipel i givim.

"Pipel i no inap selebretim laip sapos ol i no strong na helti. Yu selebretim laip taim yu stap laip na i no taim yu dai na i no inap mekim wanpela samting," Dokta Kigasung i tok.

• Planti Katolik manmeri insait long kantri bai karim kruse na wokabaut bihainim stori bilong Jisas taim em i dai 2000 yia ligo pinis

• Lent em taim blong sori long sin pasin, tanim bel na go bek long God. Long olgeta hap bilong PNG bai i gat kankain selebresen bilong makim dispela Ista taim insait long Katolik sios.

Stretim ol helt sevis, Dokta Kigasung i tok

"WANPELA eria we ol pipel i mekim asua na i save givim hevi long planti ol lain em ol kondisen long ol haus sik bilong yumi. I no long taim i go pinis, mi bin go long haus sik bilong mipela long Lae long lukim sik brata bilong mi. Na mi bin kirap nogut long painim ol sik manmeri na pikinini husat i wet long kisim marasin bilong ol, i slip long floa na ol bens na i nogat ol gutpela samting bilong daunim pen bilong ol," Dokta Kigasung i tok.

Em i tok pasin bilong mekim orait ol sik manmeri na pikinini em i wanpela bikpela save. Em i tok dispela em i no samting bilong save tasol bilong painim aut sik na makim wanem kain marasin, sik manmeri na pikinini i mas kisim bai em i orait.

Dokta Kigasung i tok husat manmeri i mekim dispela wok i mas gat pasin bilong laikim tru ol sik manmeri na pikinini na i mas gat laik long lukautim ol.

"Haus sik em i sapos long ples we ol sik pipel i mas painim bel isi na kamap gutpela gen na sik bilong ol i ken orait na ol i ken painim laip na i ken selebretim laip. Sapos ol haus sik i no givim dispela bikpela sevis i go long ol pipel, orait samting i rong," Dokta Kigasung i tok.

Em i salensim ol bos bilong haus sik long lukluk long dispela na gavman long lukluk i go insait long stretim ol haus sik long PNG na wanem ol sevis ol pipel i gat laik long en insait long wok bilong komyuniti helt woka, nes, sista, helt ekstensen opisa, na ol dokta.

Morobe bungim hevi long tisa sot

VERONICA HATUTASI i raitim

GAVMAN rifom we i bin stat long kantri long 1995 i wok gut long sampela dipatmen na i no tumas long ol narapela.

Ol rifom o senis i karamapim provinsel level, Lokol Level Gavman, ol nesenel helt, edukesen na ol arapela gavman dipatmen moa.

Long las wik, ol edukesen seketeri bilong olgeta provins long kantri na ol arapela bikman long provinsel na nesenel edukesen i bin bung long wanpela wik kibung long Mosbi na toktok long ol samting we i karamapim edukesen rifom na ol arapela samting moa long

dipatmen.

Basuk Erewiong Siaman bilong Edukesen Sevis long Morobe provins taim em i givim edukesen ripot long bung i bin tok tru edukesen rifom i go het, sampela hevi i kaamp.

Dispela em long sait bilong ol sekonderi na komyuniti skul tisa we i gat hevi long ol tisa i sot na tu ol skul i sot long ol kurikulum metiriel.

Mista Erewiong i putim askim long gavman na Edukesen Dipatmen long lukluk kwik long dispela hevi.

Stat long taim nupela edukesen rifom i kam insait long kantri long 1995 na edukesen dipatmen i kamapim ol elementeri skul, ol praimer na sekonderi topap, planti tisa i wok long

mekim dabel wok. Na tripela level i wok long sot long ol tisa bilong karimaut ol wok long wanwan eria bilong ol.

Mista Erewiong i laikim gavman na edukesen dipatmen long apim pe na ol kondisen bilong ol tisa. Em i tok em (gavman) i ken wokim dispela long givim moa alauwens nagutpela haus na ol tisa i ken amamas na mekim gut wok.


Em i tok Nesenel Dipatmen ov Edukesen (NDOE) i no kamapim yet mak bilong pe long ol tisa husat i save wokim dabel o moa wok long Morobe provins.

Em i tok long dispela taim kantri i bungim hevi long mani sot, sapot bilong pablik na ol nesenel memba i bikpela samt-

ing long skruim wok bilong ol pikinini i ken kisim gutpela skul.

Mista Erewiong i tok sapot bilong Lokol Level Gavman i go long ol skul long Morobe i gutpela na i kamap long ples kliia long manimak we LLG i katim long baset dispela yia bilong karimaut ol wok bilong sanapim ol nupela klasrum, ol haus tisa na ol arapela samting moa long ol topap na elementeri skul.

Em i amamas long helpim we AusAID i givim long peim Besik Edukesen program na tu program bilong bildim ol nupela klasrum, ol saiesn laboretori na ol arapela skul bilding long ol prameri na sekonderi skul long provins.



• Gordon Sekendari Skul hall i pulap tru long ol sumatin taim ol bung wantaim ol senior edukesen opisas long opening bilong Edukesen minista's kaunsil long las wik. Foto: Issac Ikuavi.

Morobe elementeri tisa trening stap long hevi

MOA LONG 7,000 elementeri skul pikinini insait long Morobe provins inap bungim hevi long kisim gut skul sapos ol edukesen atoriti long provins i no wokim samting, Siaman bilong provinsel Edukesen Sevis long Morobe Basuk Erewiong i bin tokim Nesenel Edukesen bung taim em i givim edukesen ripot long provins bilong em.

Morobe provins i gat 174 elementeri skul na em i wok long kisim moa sumatin long elementeri level long olgeta yia. I gat 247 elementeri skul tisa na sampela moa i bin greduet long mun mas long dispela yia. Moa bai greduet long mun Jun.

Mista Erewiong i tok long nau, i nogat program kodinesen o lain long lukautim elementeri tisa trening program na tu wok bilong supavaisim ol tisa. Na dispela i ken bagarapim skul bilong ol pikinini na laik bilong ol long lainim samting, Mista Erewiong i tok.

Em bin tok edukesen rifom long provins i gat plen long

kirapim moa elementeri skul long Morobe tasol ol i sot long tisa. Na pasin bilong daunim mak bilong ol lain i wokim elementeri tisa trening i kamapim hevi na provins i no bungim taget bilong em long dispela eria.

Mista Erewiong i tok bikpela nit i stap long wan wan distrik long provins long karimaut ol elementeri tisa trening program.

Tasol em i tok ol komyuniti i givim bikpela sapot long ol elementeri skul na ol pikinini i gat bikpela laik long skul na stap insait long ol arapela skul ektiviti.

Em i tok dispela i soim gutpela piksa bikos em i planim strongpela beis long laik bilong lainim samting taim ol i go long ol bikpela skul.

Ripot i tokaut olsem long ol pikinini wantaim krismas we inap stap long elementeri skul, 43 pesen tasol i wokim elementeri skul tasol mak bai i go antap long wan wan yia.

AusAID helpim ol elementeri skul

AusAID i helpim ol elementeri skul insait long kantri wantaim K1 milien bilong prinim ol skul bilong ol tisa na sumatin long yusim long skul.

Mak bilong ol buk we AusAID sponsa program bai prinim em samting olsem 1.2 milien.

AusAID i givim ol wok kontrak long foapela prin kampani long Mosbi long karimaut ol wok bilong prinim ol buk ya. Em long Graphos Limitit, PNG Printing, Pos PNG na Salvesen Ami. Ol prin kampani ya bai prinim na tilim ol buk i go long ol skul.

Nesenel Edukesen Dipatmen i laikim ol buk long sapotim edukesen rifom long ol elementeri skul insait long kantri. Kurikulum Developmen Divisen bilong Nesenel Edukesen Dipatmen i redim ol program metiriel samting bilong prinim we AusAID i fandim long prinim na tilim

long ol skul long kantri.

Ol prin kampani i kisim dispela wok olsem salens na ol bin kisim mao wokman long helpim ol i prinim ol dispela buk hariap bilong ol elementeri skul long yusim.

Sekon Seketeri bilong Edukesen na trening wantaim AusAID long PNG Heather Dornoch i bin tok AusAID i bin givim kontrak long prinim ol buk long PNG bikos dispela bai givim sans i go long ol nesenel prin kampani long go insait long wok bilong tilim ol buk bilong eid program.

Em bin tok wanpela bikpela tingting bilong AusAID em long yusim ol PNG wokman na save na ol nesenel kampani long skruim ol program we em i karimaut insait long PNG. Na dispela prin projek em wanpela long ol program we gavman bilong Australia i karimaut long helpim Nesenel Dipatmen bilong edukesen.

Lukautim gut tit


Rot bilong klinim tit bilong yu

Bihainim ol dispela rot long klinim tit bilong yu.

Sapos yu gat bras bilong klinim tit o tutbras na marasin em tutpes, klinim ol ausait hap bilong ol tit pas-taim olsem long piksa namba wan.



Yu pinis long dispela, klinim ol insait hap bilong ol tit olsem long piksa namba tu.




Bihain yu klinim ol dispela hap tit we yu save katim o brukim kaikai long en, olsem long piksa namba tri ya.

Sapos yu nogat marasin bilong klinim tit, yusim bras tasol.



Sapos yu nogat tutbras, yu ken yusim skin bilong buai, skin bilong kokonas, hap kaikai bilong sugakein o hap han bilong guava prut olsem long piksa.



Klinim tit bilong yu olgeta de na bai yu gat gutpela helti tit we bai lukautim yu.



Ol piksa i kam long Oral Helt sevis wantaim Helt Dipatmen.

WANTOK

NIUSPEPA BILONG YUMI OL PAPUA NIUGINI STRET

Ista em i taim bilong skelim pasin na strongim bilip

Wanpela wik gen i pinis gen na i no gat planti senis i kamap. Ol memba bilong Palamen i kisim wan wik malolo na Praim Minista Sir Mekere Morauta i go raun long Japan. Long olgeta ples long Papua Niugini ol pipel i mekim wok bilong ol. Ol i wok gaden, painim abus, wok saksak, katim diwai, sanapim haus, mekim wok kastam na ol arapela wok ol i save mekim long taim san i kamap inap taim san i go daun.

Long dispela wik, ating bai planti ol dispela samting yumi mekim long wan wan de long wik bai i senis liklik. Bikos dispela wik em i Holi wik. Ista i bikpela de long laip bilong yumi ol Kristen manmeri. Kirap long dispela wik i go inap long Ista Sande bai i gat kain kain samting i kamap long makim longpela rot Jisas i bihainim long taim ol i kotim em na kalabusim em na em i karim diwai kruse i go long ples we em i dai na ol i nilim em.

Yumi wan wan i ken skelim laip bilong yumi insait long famili na komyuniti bilong yu. Em i taim bilong tingting long ol gutpela pasin yumi mekim na ol samting yumi les long mekim. Em i taim bilong tingim ol brata susa husat i nidim helpim. Em i taim bilong mekim gen promis bilong sanap strong na mekim stretpela wok olsem Jisas i bin mekim taim em i stap long graun.

Tude planti bilong yumi i paul nabaut. Ol samting bilong graun i mekim yumi i aipas na i givim baksait long stretpela pasin. Yumi no tingting moa long laip bilong ol manmeri pikinini husat i stap long ples. Laip long ples i no isi olsem laip long taun we yumi no hatwok long painim wara o paiwut bilong kukim kaikai. Ol dispela samting i stap pinis. Yumi no tingting long ol mama i mas wokabaut longwe tru long painim wara, o kisim pikinini i go long haus sik o skul o karim kaikai i go long maket bikos yumi gat ka o yumi ken kalap long bas na go long wanem ples yumi laik go long en.

Pasin bilong tude i mekim yumi tingting long yumi yet na givim baksait long ol narapela. Dispela kain pasin i as bilong kain kain hevi i kamap nau long PNG. Dispela pasin i soim olsem i gat tupela kain pipel i stap, ol maniman na ol rabisman. Em i as bilong tok. Ol rabisman i laik painim wankain amamas olsem ol maniman tasol i no gat rot long kisim mani. Dispela i mekim na ol i belhat na brukim lo long painim mani.

Maski sapos gavman i givim planti mani long ol plisman o ol kot i givim bikpela mekimsave ol trabel bai i kamap yet. Nau em i taim bilong skelim tingting na painim rot long helpim komyuniti bilong yumi. Yumi save olsem long taim Jisas i stap long graun em i no bisi long bungim ol samting bilong graun na sindaun olsem wanpela bikman. Nogat. Em i wokabaut long lek na i autim Gutnius long ol mameri. Em i mekim gut long olgeta manmeri pikinini.

Long dispela Ista wik, em i gutpela taim long skelim tingting na strongim bilip bilong yumi.

Yumi ol Kristen em ol bilip manmeri. Bilip bilong yumi i tok ol samting bilong graun em i bilong dispela liklik taim tasol. Pe bilong yumi i stap long heven olsem na yumi no mas pas tumas long ol samting bilong graun.

Gordens Maket i pas yet

San i hatim ol na ren i wasim ol tasol i no gat narapela ples bilong salim kaikai long maket long Gordens.

Dispela poto i soim ol pipel i maket nabaut arere long rot long Gordens.

NCD i bin pasim Gordens maket las yia long mun Novemba long stretim ol baret na sanapim gut ol bet na ples bilong sindaun.

Tasol nau klostu sikispela mun i lus pinis na maket i pas yet na tarangu ol manmeri i painim taim long san na ren. **Poto: Issac Ikuavi**



Ol NGL gavana toktok long bung wantaim

Ol gavana bilong faipela Niugini ailan provins i pasim toktok long bung wantaim. Ol i autim dispela toktok bihain long kibung bilong ol long Kokopo long wiken.

Gavana bilong Manus Stephen Pokawin, John Momis bilong Bougainvil, na eking gavana bilong Is Nu Briten Leo Dion na Isidore Teli bilong Wes Nu Briten i bin bung long Kokopo na toktok long dispela samting.

Gavana bilong Miu Ailan Paul Tohian i no bin stap long dispela bung.

Ol Nesenel memba bilong Palamen bilong Is Nu Briten i bin toktok long kamapim wanpela komiti long glasim dispela tingting bilong provins i bosim olgeta wok bilong em yet.

Olpela memba bilong Gasel, Nakikus Konga i bin kamap long Redio Is Nu Briten long Fraide na tokaut olsem ol lida bilong provions i askim em long kisim tingting bilong ol pipel bikos ol i no amamas long wok gavman i mekim nau long ranin kantri.

Em i tok i no bin gat wanpela senis i kamap aninit long rifom gavman i mekim long ol provions. Em i tok tu olsem planti memba long palamen i tingting nau olsem sapos gavman i larim Boganevil i bosim olgeta wok bilong en yet, orait watpo ol i no inap givin wankain pawa i go long ol narapela provions.

Uvistract i no gat mani
Uvistract i no gat mani. Long taim beng i pas long Mande apinun Uvistract i no bin kisim dispela K581 milien

OL HAP HAP
nius

em i bin promis long kisim i kam insait long kantri. Beng akaun bilong ol i soim olsem i no gat mani.

Gavman i bin tokim dispela kampani long bringim mani i kam insait long kantri bipo long Mande 17 Epril. Sapos ol i no inap long bringim dispela mani i kam insait, orait ol dairekta, Noah Musingku, Noah Ariku, Meshach Autahe na Nelson Maiha bai i mas baim dispela mani.

Saut Pasifik Forum

Bikpela bung bilong ol lida bilong ol kantri long Saut Pasifik bai i kamap long kantri Kiribati long mun Oktoba. Ol i kolim dispela bikpela bung Saut Pasifik Forum. Dispela kibung bai i kamap long Tarawa ailan tasol ol i ting bai i no gat planti lida bai kamap long en bikos em i klostu long yia i pinis na planti bilong ol i gat planti wok long mekim long dispela taim.

Las yia dispelakibung i bin kamap long Palau long hap bilong Maikroneia na hap namba bilong ol lida tasol i bin kamap.

Balus bilong Air Nauru i save flai i go long Kiribati wanpela taim long wik tasol olsem na husat lida i laik go long dispela kibung long Kiribati bai i kalap fri long balus bilong Nu Silan Air Fos.

Pundari i laik joinim gavman

Lida bilong Edven PNG Pati, John Pundari i bung wantaim Praim Minista Sir Mekere Morauta na tokim em olsem em (Pundari) i laik joinim gavman. Em i tok pati bilong em i bin sapatim Parim Minista long kamapim dispela gavman na ol i sapatim wok praime minista i mekim nau long stretim mani wari bilong PNG.

"Yumi lukim nau kaikai bilong ol polisi bilong Saplimenter Baset na baset bilong 2000," em i tok.

Em i tok ol bisnis na ovasis lain tu i luksave long gutpela wok bilong gavman na pati bilong em i laik helpim gavman long skruim yet wok.

Mista Pundari i tok lain bilong em i helpim long kamapim dispela gavman na ol i laik stap wantaim gavman inap long taim laip bilong dispela palamen i pinis.

Wel i sut nau long Moran 4

Wanpela mopa wel bai stat long pamim wel long Saten Hailans. Long Mande, ol i tetim paip long Moran 4 na wel i sut i kam ausait. Moran 4 i stap namel tru long bikpela maunten long hap bilong Homo Pawa na bai kamapim bikpel wok tru aninit long Petroleum Laisens 138. Seketri bilong Petroleum na Eneji, Joe Gabut i tok Moran 4 i gat bikpela wok long mekim long dispela bisnis bilong pamim wel long kantri bikos ol savemen i wok long


painimaut moa long hamas wel i stap long dispela hap.

Ol plisman sasim olupela bos bilong Geming Bot

Man husat i bin siaman bilong Nesenel Geming Bot, Daniel Mapiria bai kamap long ai bilong kot. Ol plisman i sasim em long paulim K3milien. Plis Komanda bilong NCD, Raphael Huafolo i tok ol i sasim em long 41 kaun bilong paulim K3milien, em mani bilong gavman. Mista Huafoli i tok tu olsem Mapiria i bin traim long givim mani long ol plis frod skwat husat i mekim wok long dispela sas bilong em. Mista Huafolo i tok Geming Bot i bin sutim tok long mani i paul na plis frod skwat i stat long mekim wok painimaut na ol i painim olsem planti ol dispela sek em ol i raitim long pe kes na i go long ol stua long Mosbi.

Plisman i sasim tripela man long katim nek bilong manki Morobe

Ol plisman long Mosbi i holim na sasim pinis tripela man em ol i bilip i bin kilim na katim nek bilong wanpela manki Morobe long Nain Mail Setelmen tupela mun i go pinis. NCD Plis Koanda Raphael Huafolo i tok ol plisman i sasim ol tripela man ya tu long bagarapim wanpela meri long dispela setelmen. Mista Huafolo i tok olsem dispela tripela man em Philip Gatau, 23 krismas bilong ples Anaiwai long Sentral provions, Vincent Moimoi 25 krismas na Eric Tami tupela i bilong Garaina long Morobe provions.




• Antap: Em ol kas nogut bilong Telikom womens softball tim. Ol i wilwilim Bismark Sharks 4-2 long kisim 1999/2000 primiasip taitel.

• Lephan: Sans ya . . . dispela Brown Eagles pilaia i smail wantaim na i kam long hom bes. Eagles i dastim Karanas 3-1 na kisim bek primiasip taitel bilong Lae softball.

• Aninit lephah: Eksen namel long Karanas na Eagles long Lae softball gren fainel.

• Aninit raithan: Kas bilong ol Lae mens Brown Eagles tim.



• Antap: Kepten bilong Karanas Jerry Sael i kisim ol rana ap tropi bihain long Lae mens gren fainel. Man i mekim presentesen em Edministreta bilong Morobe Ainea Sengero.

• Antap lephan: Em i gat mining bilong smail olsem na em i smail gut tru. Kepten bilong Brown Eagles tim Dickson Woiwoi i kisim wining tropi.

• Eksen namel long Bismark Sharks na Telikom long gren fainel pilai bilong ol meri long Lae.
Ol poto: Sape Metta.

**IKEN WOKIM GUTPELA SAMTING LONG YU**

Paga Panthers i paia long siti

PRL RIPOT
HENRY MORABANG i raitim

PAGA Panthers i soim olsem em i save strong long ol biknem pilaia taim em i winim Toyota Brothers 22-20 insait long Pot Mosbi Ragbi Lig kompetisen las wik.

Skoa i sanap 20-20 klostu long fultaim tasol gutpela tingting bilong hapbek bilong Paga Ugufa Ugufa na em i kikim wanpela penalti gol long winim dispela gem.

Long haptaim Brothers i go pas wantaim skoa 10-8, tasol ol boi Panthers i kamapim strongpela gem tru long kam bhain na winim gem.

Ol trai bilong Brothers long namba wan hap i kam long Nelson Wanga na Richard Sinamoi na long Paga Panthers em Francis Wani na Alphonse Gale i skorim.

Insait long namba tu hap, ol Brothers i taitim bun na i no westim taim taim Tony Mote i surikim skoa i go long 16-8.

Tasol ol Panthers i bekim wantaim wanpela gutpela trai taim winga Eddie William i brukim difens bilong Brothers na ran i go putim trai. Ugula i kikim konvesen na skoa nau i sanap 16-14.

Ol Panthers i no wari o surik. Ol i strong moa na kamapim gutpela gem we Wani, Peter Sterlo na Nick Andy i winim planti graun taim ol i holim bal.

Ol i pilai na Jeff Eddie i putim wanpela trai na Ugufa i kikim konvesen na ol i go pas long skoa 20-16.

Samting olsem 10 minit i stap ol pilaia bilong Brothers olsem Sinamoi, Wanga, Mote na Willie Enoch i kamapim strongpela gem tru long surikim ol Panthers i go bek long eria bilong ol.

Tasol ol i no pilai gut long pasin bilong



• **Bikpela fowat bilong Magani Backo Naipao i redi tasol long pinisim pilaia bilong Brothers. Tupela tim i dro 24-24 long Pot Mosbi Lig las wiken.**

holim bal na ol i lus.

Sinamoi i putim namba tu trai bilong em long levelim skoa 20-20. Dispela gem i luk olsem bai ol i dro tasol gutpela tingting bilong Ugufa i mekim ol i win.

Skoa bilong ol arapela gem em, Gerehu United i rekotim namba wan win bilong ol

egensim Kone Tigers 30-26, Waliya dro wantaim Dobo Warriors 26-all, Defence autim Hawks 36-22, Wests winim Magani 22-20 na Post Puma winim NiuFord Royals 32-24 na bikpela gem, Souths i kam long las minit na winim Wikila Tarangau 30-26.



Nem: Freda K. Gepp

Niknem: Pritz de Lade Tolae

Wok: Student tisa long Hagen Tisas Koles.

Marit o Singel: Singel

Betde: 19/03/80

Viles: Sangurap

Provins: Enga

Spot: Atletik (resis)

Namba wan kaikai: Rais na mit

Wanem ol samting yu laikim: Mekim tok pilai, harim musik na kukim kaikai

Tingting long kamap: Long kamap gutpela spot tisa

Wanem samting em bikpela long laip bilong yu long Spot: Taim mi makim PNG long namba 11 Saut Pasifik Gems long Guam, na mi winim bronz medal long 4x1000 relay resis. Dispela em bikpela samting tru bikos em i namba wan taim mi makim kantri na mi winim medal ya. Wanem ol eria long spot yu long traim stretim long resis? Bikpela samting em taiming na weits.

Arapela spot yu save pilai: Basketbal na soka taim atletik sisen i stap.

Compiled by TIMOTHY AIMS

Henry Kila em nupela bos bilong PNG Spots Federesen

PAPUA Niugini Spots Federesen i makim Henry Kila olsem nupela presiden bilong em long anuel jenerel miting long las wiken.

Mista Kila i winim dispela sia long wanpela ileksen resis name long em yet na olpela presiden Sir Henry ToRobert. Insait long ileksen, Kila i winim 23 vot na Sir Henry i winim 15 tasol.

Na long resis bilong sinia vais presiden Tony Green kisim ples bilong Andrew Ikufu. Ikufu i lus long 10-24 vot. Veitu Diro i holim yet sia bilong em olsem vais presiden (wimen) taim em winim Emily Taule 27-11.

Ol arapela memba bilong jastifikesen komiti em Raymond Hoada, Aisa Nao na

Janet Sape. Ol dispela lain tasol i resis long jastifikesen komiti.

Swiming na atletik i muvim mosen olsem Sir Henry ToRobert i mas kamap olsem laip memba bilong PNG Spots Federesen.

Tasol Sir Henry i askim sapos dispela nem laip memba em i nem nating o olsem wanem. Em i no bekim gut askim na i tok olsem em bai toktok wantaim ol famili memba bilong em pastaim.

Kila i tok namba bilong ol vot insait long dispela miting i soim tru olsem i mas gat tenis long eksekutiv bilong PNG Spots Federesen.

Nau bai i gat tenis we bipo PNGSF i save givim oda long ol nesanel spots federesen.

Tasol dispela bai tenis, na em i askim olgeta lain long kamapim gutpela wok bung-wantaim.

"Nau bai gat tupela sait wantaim. Na em i no laik PNGSF tasol i mekim ol wok. Ol spot tu i mas toktok long PNG Spots Federesen," Kila i tok olsem.

"Ol i makim long mekim wok. Na mi bai surikim ol wanem wok em Sir Henry i lusim i stap.

Kila i tok em i laik kamapim wanpela tri-ya developmen plen long redim tim i go long 2003 Fiji Gems.

"Mipela i no inap plen insait long tripela mun tasol long rijonel na intanesenel gems nambaut," nupela presiden i tok.

Moa tim givim nem long IC Fund Charity Kap

MOA wanpela ten foa (40) tim i tingting long givim nem long stap insait long Charity Kap soka resis long Ista wiken.

Dispela soka salens em long wokim mani bilong ol turangu we PNG Soka Charity Trust pas long en. PMSA wantaim MRDC, Orogen, Invesment Korpersen na Fio, Posman na Kua Lawyers i redim pepa wok bilong dispela kompetisen na givim sponsasip mani.

Siaman bilong Ogenaising Komiti Rio Fiocco bilong Fio, Posman na Kua Lawyers i tokim Wantok olgeta wok redi i stap pinis long dispela sempionsip.

Arapela bikpela samting nau em ol tim husat i givim nem i no salim kwik nominesen fom bilong ol. Wanwan kampani bai baim K200 long putim wanpela tim. Sapos em i gat tingting long tupela tim orait ol i mas baim K400 olgeta.

Las yia ol i holim wankain resis we ol i wokim K7,000. Dispela mani em ol i givim las wik i go long Aitape Disaster Childrens Fan.

CHARITY KAP RIPOT

Ol mani husat bai kamap long dispela wiken, em PNG Soka Charity Trust bai givim i go long Cheshire Homes long Hohola.

Dispela soka salens em Seven-A-sait tonamen. Kompetisen ya bai stap long Sarere, Sande na Mande.

Bihain long fainels bilong Seven-Asait soka tonamen, tupela grenfainel tim bilong las yia IBS United na Defence bai salens long IC Fund Charity Cup.

"Dispela kompetisen bai pulim planti ol biknem kampani long putim tim. Bikpela astingting em long pilai na amamas na semtaim tu mekim mani bilong Cheshire Homes long Hohola," Fiocco i tok.

Wanem ol lain kampani i laik putim nem i mas ringim Joe Turia long 321 7600, Jonathan Tannos 321 7133 na Enoch Pokarup 321 7133 o siaman yet, Mista Fiocco long 3200127.

Wewak i kisim namba wan netbal kos

PAPUA Niugini Netbal Federesen i stat long holim ol ampaia kos insait long kantri long traim mekim netbal i kamap namba wan gem bilong ol meri.

I no longtaim i go pinis, PNG Netbal Federesen i salim wanpela sinia na intanesenel pilaia Gima Rupa i go long Lae long holim priliminari na Level 0 kos bilong Wewak Netbal Asosiesen.

Rupa husat i holim kos i amamas tru bikos long ol meri i soim bikpela laik long sindaun

NETBAL RIPOT

long ol kain kos olsem.

Ol Moripi i sindaun pinis long dispela kos na bai pinis bipo long Ista sempionsip bilong ol long Ista wiken. Samting olsem 32 tim olgeta karamapim ol viles insait long Moripi eria bai pilai long dispela kompetisen.

Gima i tok olsem long Wewak em i guria stret long lukim planti meri i kam sindaun

long dispela kos. Dispela kain pasin i soim tru olsem ol mama long Is Sepik i tu i laik save moa long netbal ya.

Presiden bilong Wewak Netbal Asosiesen Helen Heni tok olsem dispela kain woksap o kos em long helpim ol meri long ol i ken save gut long kain pasin o stail long ranim netbal kompetisen.

Em i tok em i gutpela long lukim ol meri i ampaia na ranim ol kompetisen long kain ples olsem Wewak.

Insait long arapela stori, Wewak Netbal Asosiesen i statim pinis pri-sisen bilong na bai pinis long dispela wiken.

Sisen propa bilong em bai stat bihain long namba tu wik bilong Me.

I gat 9-pela tim i rejista long sinia gret, 11-pela long juni divisen. Junia divisen i karam-paim anda 13 na anda 15.

Tim long sinia gret i pulim ol skul tim long Brandi na Bisop Leo Arkfeld Haiskul.


IKEN WOKIM GUTPELA SAMTING LONG YU

Momase dats bai kamap long Lae

MOMASE DATS RIPOT

FRANCO NEBAS i raitim

BIKPELA rijonel sempionsip bilong Momase Dats bai kamap long Lae long dispela wiken.

Presiden bilong Ahi Dats Asosisen Robin Steven i tok ol komiti bilong em i wok hat tru na sambai tasol long holim dispela tonamen.

Steven i tok ol lain husat i soim laik long kamap nau em Wau (tripela tim), Ramu (tupela tim), Madang (tupela tim) Bulolo (tupela tim), Finshafen, Bukawa, Morobe na Lae bai kamap wantaim 8-pela tim olgeta.

Em i tok samting olsem moa long 300 pilai bai kamap long dispela Ista sempionsip long Lae.

Momase Dats sempionsip bai stat long Sarere na pinis long Mande.

Em i tok ol ogenaising komiti i wok hat long stre-tim pinis ol ples bilong slip na pilai. I gat tripela ples we tonamen bai kamap long em i Ples Sosel Klub (PSC), DT Klub (Igam) na Sajen Mess (Igam).

Fi bilong tonamen i sanap olsem nominesen fi bilong wanwan tim em K200 na rejstresen fi bilong wanwan pilai em K20.

Neselen sekretari bilong PNG Dats Federesen Ronald Chow bai opim dispela Momase Dats sempionsip.

BHP givim K5,000 long Lae Lig

ISTA KAP LIG RIPOT

BIKPELA spona bilong Ista Kap salens, BHP Lysaght i givim K5000 i go long Lae Ragbi Lig long holim dispela kompetisen long dispela ya.

Wina bilong dispela resis bai kisim K1,800, na namba tu bai kisim K900 na namba tri K500 na foa K300. Samting olsem 8-pela klub husat i save resis long Lae lig kompetisen i givim nem long dispela Ista Kap salens ya.

Ol arapela tim husat i no pilai long fainel bai kisim K200 wanwan klub. Dispela Ista Kap resis bai ron inap long tripela de stat long Sarere.

Jenerol Menesa bilong BHP Lysaght, Brent Roberts i tokaut olsem kampani bilong em i save sapotim Lae Ragbi Lig long longpela taim nau. Dispela sponsasip bilong BHP na Lae i go bek long yia 1987.

Em i tok dispela em mas longpela na bikpela sponsasip Lae ragbi lig save i kisim wankain ol arapela kampani olsem mesa spona bilong inta siti spona, Lae Bildas nba Kontrakts (LBC Bombers).

Bihain long em i givim mani i go long lig edmin-strata David Allen, Robert i tok, em amamas long stended bilong gem long Lae na em i lukluk fowat long dispela kompetisen we bai kamap long dispela wiken.

Em i tok spot em wanpela bikpela developmen bilong ol yuts na long wankain taim ol klub edmin-istresen mas kisim tok tenkyu long taim ol i save givim long lukautim ol wanwan klub.

Ol arapela awot i sanap olsem Pilaia bilong tonamen bai kisim K100, Man of the Match awot em K50, Lig edministresen bai kisim K150, na arapela K100 i go long referi na ol opisel bilong BHP yet bai kisim K150 long ranim kompetisen.

Bai i gat tupela pul i resis long dispela kompetisen Pul A: Panthers, Tigers, Magani na Spiders.

Na long Pul B: Brothers, Royals, Tarangau na Defence.

Olpela presiden bilong Lae Ragbi Lig i makim mas bilong ol opisel bilong LRL na tok tenkyu long BHP Lysaght. wankain taim yet olpela Lae lig presiden George Mack i tok tenkyu i go long BHP Lysaght.

Em i tok lig edministresen i plenim fowat gut long lukim dispela 15-yia sponsasip kamap nambawan tru.

Em i tok mipela i laik plenim gut long yia 2001 we bai i gat planti singsing grups na ol arapela samting wankain olsem long namba fan aniveseri.

Insait long arapela stori, Tarangau em i nupela 9s sempion long Lae lig bihain long winim Spiders.

Fainels bai kamap long Ista wiken

KENNEDY EDENE i raitim

KOIARI Ragbi Lig i pinisim olgeta raun bilong 10-asait tonamen bilong em las wiken long larowari Oval long Sogeri.

Long bikpela gem i bin kamap las wik, IBS Pukpuk husat i kisim nupela spona gen long IBS i no laki tumas na Sogeri Choice i bagarapim sindaun bilong ol 12-10 las wiken.

Sogeri Choice nau i sindaun namba wan long poin lata bilong KRL.

Pukpuks i lus na go sindaun long namba tu ples.

KOIARI LIG RIPOT

Pukpuk i lus tupela taim pinis. Namba wan lus em wantaim Trek Warriors 14-12 na arapela lus em egensim Sogeri Choice las wiken 12-10.

Tim husat i kisim gutpela spona long IBS i gat sans yet long pilai insait long fainel.

Crystal Eels husat i no statim gut sisen i rekotim tupela we las wiken. Ol i winim Warriors 10-4 na Hooks Tigers 18-14. Ol Trek Warriors winim wanpela gem tasol na em egensim IBS Pukpuks 14-12.

Sempion tim bilong las yia, Hooks Tigers i lus tupela taim.

Tigers i bin mekim sampela gutpela pilai tasol ol i no inap stapim ol birua bilong ol long bagarapim tru sindaun bilong ol.

Ol lus long Sogeri Choice 26-8 na lus gem long Crystal Eels 13-14.

Sori long ol, ol Tigers bai ol nogat sans long pilai insait long fainels long dispela Ista wiken.

Skoa bilong riserv gret i sanap olsem Warriors lus long Crystal Eels 4-10, Sogeri Choice nekim Hooks Tigers 26-8 na long bikpela gem, Sogeri Choice rausim trausis bilong ol feveret IBS Pukpuks 12-10.

Long dispela pilai, Pukpuk bin go daun long 4-6 long hap-taim tasol ol bin mekim gutpela kambek long seken hap taim winga Duai i putim wanpela trai long surikim skoa i go antap 10-6.

Tasol klostu long fultaim na ol Choice bin putim wanpela senta trai na Samson Wul kikim i go konvesen na ol i win 12-10.

Menesa bilong Pukpuks Kidu Baradea i tok amamas long ol boi bilong em na i tok ol bai lukluk gen long arapela win long dispela wiken. Em i gat bikpela bilip olsem Pukpuk bai bungim Choice insait long fainel bilong Koari lig ya.


SLAM DUNK NA WIN!

Nestlé MILO

5 BIKPELA MILO SPOTS PACKS BILONG WINIM!

WANTAIM: BASKETBALL BACKBOD, MILO SPOTS BAG, MILO BASKETBALL, MILO T-SHIRT, WARU BOTOL NA KEP, NA K100 KES MONI!

EM I ISI TRU LONG JOINIM RESIS



Raitim nem na adres bilong yu long baksait bilong wanpela Milo label OR or film wanpela entri fan na putim wantaim wanpela Milo label or soipet. Igo insait long wanpela envelop na salim ikam long: **Milo Slam Dunk na Win Locked Mail Bag, Boroko NCD** OR putim insait long Rejpele Nestle. Entri baksait long ol stua husat i sapotim dispela resis.

NAME: _____ KRISMAS: _____
 ADRES: _____
 TELEFON: _____

OL RULS BILONG BIHAINIM LONG RESIS

- Olgeta manmeri na pikinini bilong PNG iken pilai long dispela resis. Tasol ol wok manmeri bilong Nestle na wok manmeri bilong ol agensi bilong Nestle wantaim famili bilong ol bai NOGAT.
- Nestle (PNG) bai salim toksave igo long ol prais wina long leta na nem bilong ol bai igo insait long National na Wantok niuspepa.
- Ol manmeri husat i winim prais i mas soim id kat.
- Ol wina ino inap les long prais na askim long kes mont.
- Ino inap asua bilong Nestle sapos prais i lus, or prais igo long narapela hap or leta ino go hariap.
- Ol wina i mas kisim prais olsem Nestle i givim na bai ino inap senis.
- Sapos hevi i kamap, Nestle husat i kamapim dispela resis, bai mekim fainol disisen.

Na olgeta entris bai kamap samting bilong Nestle.

- Bai igat faipela (5) wiki dro na bai igat wanpela wina tasol long wanwan dro.
- Dro bai kamap long ol bilong ol polis.

7pm EMTV taim bilong Dro:

- | | | | | | |
|------|-----|--------|-------|-------|------|
| 1 st | Dro | Friday | 28 th | April | 2000 |
| 2 nd | Dro | Friday | 5 th | May | 2000 |
| 3 rd | Dro | Friday | 12 th | May | 2000 |
| 4 th | Dro | Friday | 19 th | May | 2000 |
| 5 th | Dro | Friday | 26 th | May | 2000 |

* Prais bilong winim bai yupela ol wina i kisim olsem mipela i advetaisim.

RESIS BAI PINIS LONG FRAIDE JUN 2ND, 2000

MILO IKEN WOKIM GUTPELA SAMTING LONG YU

Taim bilong hangre i bagarapim Etiopia

TAIM BILONG hangre i kamap gen long kantri Etiopia long Afrika na planti ol manmeri na pikinini i dai nau. Tasol gavman bilong Etiopia i no laik yusim bris long birua bilong em, Eritrea long kisim kaikai i go insait long Etiopia.

Etiopia na Eritrea i birua na pait i stap namel long tupela long 1998 i kam inap nau. Praim Minista bilong Etiopia, Meles Zenawi i tok kantri bilong em bai i no inap larim ol sip i kam insait long Asab na Masawa maski sapos Eritrea i laik helpim kantri bilong em.

Etiopia i nidim samting olsem 800,000 (Et handet tausen) ton kaikai long helpim ol pipel. Sapos ol i no kisim dispela kain kaikai, bai planti bilong ol i dai long hangre.

Mista Meles Zenawi i bungim mauseri bilong Yunaitet Nesen, Catherine Bertini. Na em i tok sapos ol ovasis kantri i harim kra i bilong em hariap bai i no gat plan-

ti pipel i dai nau long hangre.

Em i tok ol i bin promis olsem Yuropan Yunian (EU) na Amerika bai helpim Etiopia tasol kaikai i no bin kamap hariap na ol pipel i dai nau. Long ol ples olsem Gode, planti pipel i wok long dai nau long hangre.

Tasol ol lain bilong Yuropan Yunian i tok ripot i soim olsem i no olgeta hap bilong Etiopia i sot long kaikai. Ol i salim pinis 283,000 (tu handet eiti tri tausen) ton wit i go long Etiopia long dispela yia na bai ol i salim narapela 260,000 (tu handet siksti tausen) ton long mun Jun long yia 2001.

Ren i no pundaun long planti hap bilong Etiopia na ol kaikai i no gro. Gras i dai na ol bulmakau i no gat kaikai na wara na ol tu i dai. Ol pipel bilong Etiopia i save strong long ol kau bilong ol long kisim mani na kaikai.



• Graun i drai olgeta na kau i bun nating. Dispela yangpela manki i lukautim kau long ples Tetele long saut Etiopia.

Ol skwata i tekova long ol fam long Simbabwe

BIKPELA trabel i wok long kamap nau long kantri Simbabwe long Afrika, bihain long ol skwata i rausim ol fama na tekova long fam bilong ol. Planti ol dispela fama em ol waitskin bilong kantri Ingran. Dispela pasin i kamapim bikpela kros namel long gavman bilong Presiden Robert Mugabe na Ingran.

Trabel i kamap long taim gavman i senisim lo long palamen we i tok bai ol i tekova long graun na tilim i go long ol lain husat i no gat graun.

Dispela em ileksen promis bilong Presiden Mugabe na planti ol pipel i sapotim em.

Long Simbabwe bikpela hap graun we i gutpela long groim ol kaikai na kamapim bisnis, i stap long han bilong ol fama. Planti bilong ol dispela fama i bilong Ingran na famili bilong ol i holim dispela graun bipo long kantri i kisim independens.

Las wiken sampela ol dispela fama i bin kisim bagarap taim ol skwata i pait wantaim ol. Wapela i dai pinis na planti i kisim bagarap na slip long haus sik.

Kot i givim oda long ol plisman long rausim ol dispela skwata long ol fam tasol planti bilong ol i bikhet na tok ol bai pait yet.

Ol skwata i karim akis na stik i wok long tekova yet long ol fam. Wapela lida bilong ol, Chejerai Hunzvi i tok ol skwata bai i no inap long givap.

Em i tok, "Mipela i wet inap 20 yia nau na bai mipela i no inap wet moa."

Vais Presiden bilong Simbabwe i askim ol pipel long harim tok. Em i tok gavman i mekim lo pinis long skelim graun long stretpela rot na



• Lephan: Ol skwata i tekova long Bunks Hill fam.

• Antap raithan: Presiden Robert Mugabe.

• Raithan: Ol skwata i karim ol samting bilong pait.

ol pipel i no mas bikhet na mekim nabaut.

Presiden Mugabe i stap long wapela miting long kantri Kuba. Em i tok em i kisim ripot long ol

skwata i tekova long ol fam tasol em i tok i no gat man i kisim bagarap long dispela taim.

Bai i gat wapela lain bilong gavman bilong Simbabwe i go tok-



Kot long Samoa i tok tupela eksminista i mas dai

BIKPELA kot long Samoa i tokaut olsem tupela man husat i bin holim wok bilong minista bipo long gavman, i mas dai. Jas Andrew Wilson i givim dispela strongpela mekim save i go long Leafa Vitale husat i bin Minista bilong Women Afeas na Toi Aukuso husat i bin Minista bilong Komyunikeesen.

Kot i painim olsem ol i rong tru long plenim na kilim Luagalau Levaula Kamu long Julai 16, 1999. Kamu i bin dai bihain long gan i sutim em long baksait taim em i wok long toktok long mobail telpon long wapela bung bilong politiks.

Planti pipel long Samoa i bin kirap nogut long dispela trabel bikos em i namba wan taim long kain trabel olsem i kamap long kantri bilong ol.

Tasol i luk olsem bai ol dispela tupela man i no inap dai, bai ol i go stap long kalabus inap ol i dai.

Kot i bin kalabusim pikinini bilong Vitale, Alafise husat i bin sutim Kamu long wapela M16 rafel.

Jas i bin harim kot long Janueri 17 na i bin gat 65 witness i kamap long ai bilong kot. Alafise i wapela bilong ol dispela witness na em i tokim kot olsem papa bilong em na pren bilong em i bin givim oda long em long kilim Kamu.

Kot i bin harim ripot bilong korapsen i kamap strong long wok politik long Samoa. Kamu i wapela lida husat i pait strong long rausim dispela pasin nogut olsem na ol tupela man ya i pasim tok long kilim em.

tok wantaim Ingran long dispela hevi.

Bipo, Ingran i bin lukautim Simbabwe na planti ol waitskin fama ya i bilong Ingran.

Stori long sios musik long Yunaitet

Sios long Duk ov Yuk Ailan

Ol lotu singsing na musik em i bikpela samting tru long laip bilong ol Kristen manmeri. Long Papua Niugini tude i gat moa lotu singsing i kamap long tok ples na nek bilong ol singsing tu i bihainim sampela ol singsing tumbuna. Taim i senis na tingting bilong sios tu i senis. Bipo long gut taim ating ol singsing lotu i bihainim nek bilong ol ovasis singsing tasol, ples we ol misineri i kam long en.

Long begin bilong mun Epril, i bin gat wanpela buk i kamap we i stori long singsing lotu long Yunaitet Sios long hap bilong Duk ov Yok long Is Nu Briten. Andrew Midian, wanpela Yunaitet Sios pasto, i bin raitim dispela buk ol i kolim The Value of Indigenous Music in the Life and Ministry of the Church: The United Church in the Duke of York Islands.

Memba bilong Kokopo, Sir Rabbie Namaliu i bin go pas long toktok long makim dispela nupela buk long wanpela spesel seremoni long ples Molot long Duk ov Yok Ailan long Epril 1. Ol bikman na sios lida bilong Yunaitet Sios long Is Nu Briten i kamap long witnesim dispela bikpela de bilong Andrew Midian.

Orait long Mande Epril 3, nara-pela bung gen i kamap long Rarongo Teolojikel Koles na Reveren Albert ToBurua, olupela modereta bilong Yunaitet Sios i go pas long seremoni bilong makim dispela buk. I bin gat tupela bung i kamap long makim dispela buk bikos dispela em i bikpela de bilong ol pipel bilong Duk ov Yok



• Sir Rabbie Namaliu i toktok long seremoni bilong makim dispela buk long Molot.

Ailan na ol arapela Kristen manmeri.

Man i raitim dispela buk, Andrew Midian i bilong ples Utuan long Duk ov Yok ailan. Mama i bin karim em long yia 1965. Em i bin skul long Kabilomo Praimeri Skul na George Brown Haiskul. Na bihain

em i kisim skul long George Brown Pastoral Koles long wanpela yia na kisim Kristen Komyuniti Training Setifiket. Long 1986, em i go skul long Rarongo Teolojikel Koles. Em i mekim wok pasto long Molot na bihain long Vunaulul Seket, Kokopo long 1991 i go inap long 1993.

Em i wok liklik wantaim Rabaul Tok Pisin Seket long 1994 na em i lusim PNG wantaim famili bilong em na go wok long Ingran inap long tripela yia olgeta.

Midian i kam bek long PNG long 1998 na nau em i seplen bilong Gaulim Tisa Koles. Inap planti yia nau em i mekim wok bilong raitim musik, ol singsing na pilai gita na kondakta tu bilong ol kwaia.

Andrew Midian i bin raitim dispela buk olsem pepa bilong em long taim em i stadi long kisim namba ol i kolim Batsela ov Diviniti long Rarongo. Don Niles bilong Institut ov PNG Stadis i bin stretim na raitim tok i go pas. Dokta Michael Webb husat i bin stadi long musik long hap bilong Rabaul i bin raitim tu sampela toktok long dispela buk.

I tru olsem dispela buk i skelim lotu singsing na musik insait long Yunaitet Sios long Is Nu Briten, tasol ol askim bilong Midian i sut i go tu long ol arapela Kristen sios insait long kantri tude.

Sir Rabbie Namaliu i luksave tu olsem dispela buk i wanpela bikpela samting. Na em i promis long painim mani olsem bai olgeta skul long Kokopo i kisim dispela buk.


Yu ken painim dispela buk long ol buk stua long Kokopo na Rabaul na long Institut ov PNG Stadis long Boroko.



• Andrew Midian i kondaktim kwaia bilong ol man. Ol i putim bilas bilong singsing ungut.



• Dr Jacob Simet, Rev Albert ToBurua, Rev. Andrew Midian na Rev. Robinson Moses long Rarongo.



• Fr Sepncer Kombega, husat i raitim stori bilong singsing tumbun insait long Angliken sios i sanap wantaim Rev Andrew Midian.



• Rev Andrew Midian i toktok.

KANAGE



Kanage i bilong Pinapan, Morobe provins. Em go raun long Mosbi long 4 Mail, CHM stua. Wanpela Reks Ben keset Guge Poge man em harim em givim siksti long i go na em lukim wanpela yangpela meri. Meri ya mama bilong em slip long 3 Mail haus sik na em i dai. Yangpela meri ya em harim na mekim bikipela krai long mama bilong em idai. Bikipela musik krai na Kanage ting meri ya i dai. Em wok long tromoi tupela lek han bilong em wantaim. Em givim siksti long doka i go kam long fran na beksait bilong yangpela meri. Meri ting em Kanage mekim tokples na krai tu em ting olsem man bilong em lukim Kanage wok long danis go kam long baksait bilong yangpela meri. Long ai bilong planti manmeri man bilong meri ya givim hat wan long Kanage long su bilong em. Man Kanage pilim bikipela sem na tekov i go long haus bilong em. Neks de em no kam bek long CHM stua gen.

Bull Bonda
Mt Hagen

Kanage em bilong ples Diwam long Bogia distrik. Em i save stap long Buka na wok long Numanuma plantesen. Orait long fotnait Fraide em wantaim poroman bilong em manki Kawas tupela go wanwan botol long Davara Hotel. Tupela i spak nogut tru pinis na paps Kanage i pilim pispis na tokim poro bilong em long was long 4-pela botol bia bilong em. Taim Kanage i go pispis i stap wantu tasol poroman bilong em manki Kawas i kirap na dringim wanpela botol bia bilong paps Kanage. Taim Kanage kam bek na lukim olsem ol i dring wanpela botol bia bilong em man bel bilong em i sting nogut tru na em i askim Kawas olsem. Orait, brat, I fit my bottles here. Who took it one, and make it five. Taim paps Kanage i laik wokim bruk Inglis bilong em man ol waitman i lap nogut tru long tupela na manki Kawas helpim poro bilong em Kanage na tokim ol waitman olsem.

Eric Ron Kosika
Kavieng

Kanage bilong ples Lumi, em i gat wanpela pikinini meri. Long wanpela apinun pikinini meri bilong Kanage i go raun na kam bek long haus. Na papa Kanage i belhat long pikinini meri bilong em na i konim em. Trangu, lapun papa Kanage i no save gut long stretim gut ol tok pikinini bilong

em, olsem na em i konim pikinini meri bilong em. Na abrus na em tok olsem.

Yu sit yu, yu fit mi. Olgeta manmeri i harim olsem, lapun papa Kanage i putim long nambawan gia. Na i go antap long maunten na ol i kilim skin stret long lap.

Tisim Ardh
Aitape

Kanage i bilong ples Saina No 2. Wanpela taim, pikinini meri bilong Kanage i go raun wantaim boi pren bilong em, na boi pren bilong pikinini meri bilong Kanage i askim em, hey Lewa, i luk olsem yu wok long resa kampani yu, na pikinini meri bilong Kanage bekim, hey lewa, yu save mipela ol meri long Saina No: 2 save lakim 2000 resa, olsem na mipela i save wok hat tru long skin bran resa, na yupela nogat hat wok, yupela bai yusim tasol

Tisim Ardh
Aitape

Kanage i bilong ples Arak. Long wanpela taim kampani salim ol Soweiyau i go long Sowim bung graun bilong ol bai kampani i wok. Taim ol Soweiyau i kamap long ples Auri, ol i kisim nem bilong sampela boi bai wok wantaim o. nPapa Kanage i tokim boi na Soweiyau, yupela go, mi mama. Mi bai stap na kukim kaikai bilong yumi long apinun. Taim ol tekov na papa Kanage stat long ketsim samting

bilong kuk long apinun. Na yu save papa Kanage em Buka man na em i no save long kukim ol waitman kaikai. Na em i no save long sol na suga. Ol meri na papa Kanage i painim hat tru taim papa kukim kaikai, em i kisim sol na suga. Na em i testim sol na i pait, orait em i kisim suga na testim na swit orait em ting mi putim dispela em swit bai kaikai i swit, dispela em pait, bai kaikai i pait. Papa Kanage i kukim kaikai pinis na wetim boks na Soweiyas i stap. Apinun boks na Soweiyas kam long bus na papa Kanage i tok, bois kai is ready, man taim ol serim na kaikai, ol pilim olsem kaikai i no swit. Na ol askim em pilim olsem kaikai i no swit. na ol askim em papa Kanage, yu putim wanem kain sol, Kanage tok, mi putim swit sol, pait sol nogat ol bois na Poweiyas i belhat na tok, yu busman, yu no save long sol na suga, wokim na Paps Kanage sem pipia stret.

Paps Matan Emil
Aitape

Kanage em bilong Wanex long Goroka, Is Niu Briten provins. Na em i save wok olsem wanpela Mekenek. Na wanpela taim em i werim trausis. Siot i paspas long ol gris. Na ail bilong ka long em na em sindaun long as bilong wanpela diwai na wanpela meri Tolai em i bilas gut tru. Na em wokabaut i kam abrusim Kanage na i go. Kanage em kirap na singaut olsem ya meri o Kemis taim meri Tolai harim olsem Kanage

singaut long em olsem na meri Tolai kirap na singaut i go bek long Kanage olsem man o woksop taim Kanage harim olsem meri bekim i go bek long em na em tekov i go lus nating.

Jacob Joe
Kimbe

Kanage i bilong ples Woginara namba 2 stret long Dagua, Is Sepik provins. Sampela de i go pinis long 1996, foapela man i bin resisim sia bilong kaunsil long ples Woginara. Na Kanage yet i makim namba 5. Na ol 5-pela man i bin resisim dispela sia bilong kaunsil. Na taim ol manmeri i go long putim vot, Kanage yet i tokim meri bilong em na i karim sia i kam klostu long ples bilong vot na putim arere stret long boks. Na bikman Kanage i sindaun antap long Siaking i stap. Na smail tasol long ol manmeri putim X long boks. Bikos Kanage save olsem em bai win yet. Ol i vot i go pinis.

Na sem taim yet ol i kauntim vot. Ol i kauntim i go na bikman Kanage yet i kisim 2-pela vot stret. Na taim Kanage harim olsem em i kisim 2-pela vot. Man em i stat long krai. Em i krai nogut tru. Em i krai i go i go na i stat long kus. Em i kus i go na sem taim em i pekpek wara long trausis bilong em. Man em sem nogut stret. Na wail i stap long bus inap 2-pela mun olgeta. we i makim 2-pela vot em i kisim.

Erick Ame
Kimbe





Ol toktok bilong Ista

Saplimen bilong Word Publishing

Gutpela taim bai kamap

OL manmeri, Ista em taim ol Kristen manmeri i save tingim indai na kirap bilong Krai. Dispela pasin em wanpela bikpela samting em skelim o save stap namel long mipela ol Kristen na ol lain husat i save bihainim ol narapela kain bilip.

Ista long dispela yia i wanpela bikpela samting tru bilong wanem, em i namba wan Ista bilong dispela nupela milenium. Long 2000 krismas i go pinis, Redima bilong mipela i bin winim sin na indai


Ista toktok bilong
Sir Silas Atopare
GCMG KStJ Gavana Jenerel

taim em i kirap bek long indai. Em i bin soim mipela olsem mipela i gat rot bilong go bung wantaim God. Long Papua Niugini, mipela bai hamamas long 25 krismas bilong Independens long Septemba. Long Jun, wok bilong kandim olgeta manmeri insait long kantri bai kamap. Namba bilong ol manmeri em ol kisim long

dispela wok bai go long han bilong gavman long lukim na skelim long taim ol i burukim mani bilong bringim wok i go het kamap long kantri. Mi save olsem planti samting i no bin go gut long kantri. Prai bilong ol samting i stap antap, namba bilong ol man i no gat wok i kamap bikpela tru long ol yangpela bilong mipela

na ol sindaun bilong mipela long sait bilong wok bisnis na long mipela ol manmeri tu i no luk gutpela tuma. I luk olsem i no gat gutpela pasin bilong skelim ol samting i stap. Ol mani lain i wok long kamap i go bikpela yet na ol rabisman i wok long go rabis na rabis yet. Tasol long wankain taim tasol, mipela i wok long wokim kamap sampela gutpela samting. Wol Beng na IMF i hamamas long ol wok gavman bilong mipela i wok long wokim na bai givim sampela halivim long mipela. Ol kot bilong mipela tu i wok long soim olsem ol i no save wansait long ol

desisen em ol i save wokim na dispela i gutpela mak. Taim mipela i lukim dispela mipela i mas tingim olsem ating gutpela taim bai kamap long mipela ken. Olsem het tok bilong mama lo bilong mipela i tok Papua Niugini em wanpela Kristen kantri na mipela i mas traim long bihainim ol lo bilong en. Mipela i mas traim long laikim ol narapela, rispektim na i gat daunpasin na traim long sindaun belisi wantaim ol wantok bilong mipela insait long komyuniti. Mipela i ken hamamas long kirap bilong Krai na beten bambai em i ken givim gutpela tingting na lukautim gav-



□ GAVANA Jenerel bilong Papua Niugini, Sir Silas Atopare.

man long ronim gut kantri bilong mipela long gutpela rot we bai kantri i ken go het.

Mi laik bai yupela olgeta i hamamas gut long Ista na God i blesim yupela.

Pen, indai as tru bilong bilip

"Mipela i baptais pinis insait long indai na kirap bilong Krai olsem na mipela i senis olgeta pinis. Mipela i no inap harim or ritim tasol dispela stori; mipela mas bihainim tru bambai mipela i ken klia gut long pen na indai bilong Jisas em as bilong bilip bilong mipela."

TAIM mipela i hamamas long Ista, mipela i tingim bikpela wok God i bin wokim long kirapim Jisas long indai. Mipela i bilip olsem God tu i ken salim marimari bilong em long mipela long taim mipela i dai.

Bilip bilong mipela i tokim mipela olsem mipela tu i bai kirap ken wankain olsem Jisas i bin wokim long las de. Jisas em yet i no bin kirap bek long indai; God i bin kirapim em. Dispela pasin we God i bin kirapim Jisas long indai ken strongim na halivim ol manmeri husat i laik bambai kain samting olsem i kamap long laip bilong ol. Ol bilip olsem wok bilong God i wok long go het yet: "Mi yet mi kirap na laip".

Taim Mary Magdala go long hul matmat bilong Jisas, em i ting em bai lukim man husat i bin dai pinis. Ples, tudak yet tasol i bin gat liklik lait long lukim olsem ston bilong hul bilong matmat i no bin stap long maus bilong hul bilong matmat. Taim em lukim olsem em ting olsem sampela lain em i no save long en i mas stilim bodi bilong Jisas. Long taim Jisas i dai, yu ken lukim olsem ol i no laik larim em malolo.

Long hamamas kirap bilong Jisas, mipela i save luksave long dispela pasin God i gat we em i laikim tuma pikinini bilong em. Kirapim Jisas long indai em rot God Papa i soim long yumi long luksave olsem pawa bilong sin i no inap long holim Jisas. Taim God i kirapim Jisas long indai, em i kirapim tu olgeta wok em Jisas i wok long mekim insait long ol stori em toktok, ol samting em laikim na olgeta rot we em i bihainim long wokim wok bilong em. Olgeta dispela samting i gat nupela laip na nupela strong. Stori bilong indai na kirap bilong Jisas i no samting nating em ol manmeri i wokim taim ol i no laik bilip olsem Jisas i dai olgeta. Nogat. Em i wanpela nambawan pasin tru bilong luksave olsem tru Jisas i bin indai. Hamamas bilong Ista em pasin bilong muv long tudak igo insait long lait we Jisas husat i kirap long indai yet i bringim.

Long dispela lait, mipela i lukim em na luksave long ol narapela brata na susa. Dispela lait tasol i wok long tokim mipela long lusim tudak na sin pasin na traim long painim gutpela sindaun long sampela narapela rot. Taim mipela i hamamas long Ista, mipela i hamamas insait long dispela lait we pawa bilong tudak i no inap winim; mipela i hamamas long God long kirapim Jisas long indai na soim long mipela olsem mipela tu i ken kirap long indai bihain; na mipela i blesim God long ol bilip we i save askim mipela long luksave gut long ol narapela manmeri long soim tru olsem mipela i laikim God. Namba Tu Vetiken Kaunsel i bin wokim pasin bilong indai na kirap bilong Jisas olsem as tru bilong sios long bihainim long wokim wok bilong en long olgeta hap bilong graun. Namba Tu Vetiken Kaunsel tok: "Ol gutpela wok God i bin wokim long Olpela Testamen i soim tasol nambawan hap bilong wok bilong Krai long baim bek yumi ol manmeri na givim glori long God. Em i wokim dispela wok bilong em long pen na indai bilong em na long taim em i go antap long Heven we "long indai em kilim dai, na long kirap bek, em i givim laip long mipela"." Kingdom bilong heven i no samting em mipela i ken painim bihain long taim mipela i dai. Taim mipela i dai, dispela bambai rot tru bilong painim em. Tasol long taim Jisas i bin kirap long indai, em i stretim pinis rot bilong mipela long longtaim yet. Krai bilong Ista i wok long stap yet insait long sios bilong Ista. Man i no inap stap insait long sios na i no bihainim gut as tingting bilong luksave long dispela pasin bilong indai na kirap bilong Jisas. Em mas traim long stretim em yet i go kamap gutpela long ai bilong God. "Ol Gospel i no save tok klia long Ista; Ista i save tok klia long ol Gospel."

Bruder Graeme Frawley CFC
Nesenei Dairekta, Caritas PNG



OPIS BILONG GAVANA JENERAL

ISTA GRITING

Mi laik salim Ista griting i go long olgeta pipel bilong Papua Niugini.

Ista em i spesel taim tru we yumi tingim indai na kirap gen bilong Jisas Krai, Lod na Sevia bilong yumi.

Yupela olgeta i amamas na belisi long dispela Ista Wiken wantaim blesing bilong God.

Sir Silas Atopare, GCMG KStJ
GAVANA JENERAL

Hamamas long kirap bilong Jisas

I gat wanpela toktok i save go olsem: "Wanem hap i gat laip, i gat tingting bilong bihain i stap tu."

Dispela kain tingting i soim rot bilong sindaun wantaim gutpela tingting.

Ista em i taim bilong laip, pasin bilong laikim narapela na tingting long wanem samting bai kam bihain.

Jisas i bin mekim planti toktok long laip. Na em i tok olsem ol dispela man meri i save bilip long em bai kisim laip bilong oltaim, oltaim (Jn 3:15), na olsem em i bret bilong laip (Jn 6:35). John i tok olsem Jisas em i tok tru bilong God, i gat laip, laipi karim lait i go long olgeta pipel na dispela lait bai sain long taim hap i tutak (Jn 1:4-5).

Dispela Ista, long dispela Jubili Yia 2000, yumi hamamas long presen bilong laip yumi gat, na husat i givim long yumi, na long em yet i kam na stap wantaim yumi. Yumi hamamas long olaspela samting i kamap long laip bilong Jisas, laip em yet, na taim Jisas i givim laip bilong em long ol sin bilong yumi

Ista toktok bilong
Asbisop Brian J Barnes, OFM, MBE, DD

na em i kirap gen, bai yumi ken bilip na yumi yet i painim laip. Laip bilong Jisas na kirap bek bilong em, i soim lait bilong ol tingting bilong ol samting bai kamap bihain long laip bilong yumi. Yumi hamamas wantaim bel isi. Long las yia insait long PNG, yumi soim hamamas bilong Ista tasol yumi inap long pilim olsem pasin bilong birua i strong tru, taim yumi lukim kantri bilong yumi i wok long bihainim ol birua. Yumi lukim olsem dispela i bagarapim kantri bilong yumi tasol i long taim ol gutpela samting wok long kamap na tingting olsem ol gutpela samting bai kamap. Dispela Ista i soim olsem ol man meri gat strongpela bilip, long PNG taim yumi lukim prais bilong money bilong yumi wok long go antap. Yumi lukim kaikai bilong ol toktok long Loloata Understanding bilong

Bougainville. Dispela visit long Pot Mosbi, behain long planti yia, Bougainville deligesen i wokim i soim olsem em i gutpela sign long pis. Yumi lukluk i go long Gavman long ol senisim ol samting olsem, pasin bilong vot, we sapos ol i no mekim bai planti lida bai go insait long liklik namba bilong ol vot, baim ol sapota, na ol narapela pasin bilong korapsen na ol planti kot kes. Yumi mas votim ol lida husat bai kam long dispela pasin long vot ol i

Long ol samting wok long kamap long nau yet, ol politisen mas stap long we long sup-perannuation funds. Wok painimaut i soim olsem ol i wokim i mas stat nau. Na ol gavman i mas was long ol manmeri save wok hat. Na tu narapela samting em lo na oda. Ol raskol wok long wokim ol planti pasin nogut na wok long kamap nogut tru na ol pipel wok long stap wantaim pret. Ol wok long bagarapim ol meri i gat bel, ol lapun meri, na ol yangpela meri tu. Kraim na korup politisen bai bagarapim dispela kantri na ating dispela tupela i no stap wantaim. Lo na oda problem bilong yumi i soim

'Yumi mas i gat ol tru tru politikel pati, bai stapim ol memba long kalap long wanpela pati i go long narapela long bilong kisim pawa' - Asbisop Barnes

kolim, preferential system. Yumi mas i gat ol tru tru politikel pati, bai stopim ol memba long kalap long wanpela pati i go long narapela long bilong kisim pawa.

olsem i gat planti rong long em. Ol man brukim kalabus, i wok long kamap olsem planti tumas, tasol bai yu stopim olsem wanem taim CIS i no

kisim moni. I no gat planti polis bikos i no gat moni. Ol polis stesin na bareks i no planti long wanem ol i no stretim ol. Na i gat ol planti kot kes na ol haus kalabus i pulap tru. Planti sumatin wok long kam aut long ol skul na ol i nogat wok. Na taim dispela i kamap ol bai save belhat o kros. Gavman mas painim ol ansa. Praivetaisasen em i wanpela samting i gat planti hap long en. Yumi mas askim wanem samting bai kamap sapos yumi gat praivetaiseseh. Bai mani stap orait o bai ol politisen i kisim. Planti long ol gavman statutori bodi wok long bagarap long ol samting olsem politiks. Nau Palamen wok long ketsap wantaim ol konstitusenol siting na bai i gat planti problem i stap. Dispela Ista bai yumi hamamas long kirap bilong Jisas, na promis bilong laip oltaim, oltaim. Yumi lukim ol dispela na hamamas na pre dispela bai kamap gutpela bai i gat longpela na gutpela na stretpela rot na bai yumi no ken bungim ol birua.



ASBISOP Brian Barnes bilong Pot Mosbi.

Bikpela taim long kristen kalenda

Ista toktok bilong
Lt. Col. Roy Bungay
bilong Salvation Army

ISTA, i no olsem ol narapela taim long Kristen kalenda, em soim planti kain samting we i no tru tasol i tru na i no save kamap long olgeta taim long laip bilong yumi ol manmeri.

Baibel i gat stori bilong politiks egensim lotu, pasin bilong stap tru long wanpela egensim pasin bilong yu bai i no inap stap tru, trupela pasin egensim giaman pasin, pasin bilong peim man bai em i wokim wo bilong yu egensim gutpela pasin, hop egensim nogat hop na laip egensim dai. Dispela ol samting i save kamap long laip bilong yumi ol man-meri. Long dispela taim yu ken luksave olsem Ista i gat tupela sait long em, dispela sait i tudak tru na dispela sait i gat bikpela lait.

Long dispela wol yumi stap long em em i isi tru long go stap long hap i tutak. Dispela Sarere stap namel long Gut Fraide na Ista Sande em taim bilong ol disaipol bilong Jisas long sori nogut tru. Ol i wokabout wantaim ol het bilong ol i go daun, long Sarere i go inap long dispela dei ol i save olsem bodi bilong Jisas i no stap long hap ol i putim. Mirakel tru bilong Ista, em taim ol disaipol i lusim hap bodi bilong Jisas i bin stap long em na go autsait long nupela wol, wantaim nupela visen, wantaim nupela pawa, na nupela pasin bilong laikim ol narapela. Ol bai no inap wankain gen; ol i kamap ol tampol bilong God.

Dispela traipela laik bilong Jisas i wasim ol rong bilong Pita long fogivim na tok sori. Ol tupela tingting Tomas i gat i lus taim holi spirit i kam. Ol dispela manmeri husat i ronawe long em ol i kam bek long em. Ol i kamap ol tempol bilong God. Na ol i harim Jisas i tok, "Shalom", "Belisi bilong God i stap wantaim yu?"

Tasol olgeta manmeri i save redi long senisim pasin bilong ol long dispela nambawan Ista. I gat ol dispela husat i laikim hap bilong ol i dai na maski long kamap tempol, em bikos ol manmeri no nap long lukim ol, na bai nogat manmeri bai askim ol long ol samting. Long dispela pasin yumi wok long putim Jisas i go back long hap bilong dai. Olsem na tempol wantaim matmat i wok long resis. Long stap long wanpela hap na bilip olsem Jisas i kam bek na em i stap tru na wantaim yumi. Long nau yet yumi mas luksave olsem Jisas i no bilong ol dispela 2000 yia pinis, tasol em i stap long dispela taim tu, em bai no inap lapun hariap tru. Em i no bilong aste tasol, em bilong nau na oltaim. Wanem hap Jisas i stap long en, em hap bilong sios bilong em, na ol pipel i gat paia long ol. Dispela paia i gat lait na i no stap long tudak.

Em i sain wantaim hop, na bai fogivim yu na em i gat traipela laik olgeta. Dispela Jisas i les long stap long matmat, i les tu long stap long hap i gat ol pasin bilong ol man meri i hamamas tru na save laik win olgeta taim.

Tru yet long Kristen kantri olsem Papua Niugini, em bai no inap isi long planim Jisas, tasol em bai no inap nambawan taim long kamap long wanpela kristen kantri. Ol diwai kruse yumi pasim Jisas wantaim i wok long soim ol pasin nogut yumi ol man meri i save wokim. Yumi yet save pasim Jisas long pawa bilong em taim em no save bung wantaim politiks, ekonomi, komyuniti, edukesen, famili na ol pasin bilong skelim ol dispela ol pasin Olsem na Papua Niugini inap long harim tok na planim em o wokim em olsem wanpela tempol, bai klin na wokim bai olgeta man meri inap long sensim dispela graun. Na mi laik kamap wanpela tempol i no matmat! Hepi Ista!



Ista

Trading Hours -

Thursday	20th April	- 8:00 am to 7:00 pm
Good Friday	21st April	- Closed
Saturday	22nd April	- 8:00 am to 7:00 pm
Sunday	23rd April	- 8:00 am to 7:00 pm
Monday	24th April	- 8:00 am to 7:00 pm

Amamasim Ista Holide!!

Krais i winim indai

IGAT planti na kainkain rot bilong ol manmeri long hamamasim ol yet. Sampela em long taim nupela pikinini i kamap, sampela em long tingim de mama i karim ol long en, sampela em long taim bilong kisim ring long marit na arapela em long taim ol i pinis long skul or long luksave long wok em wanpela memba bilong famili bilong yu i wokim insait long wokples o long komyuniti. Pasin bilong hamamas i save kamap bihain long sampela gutpela samting i kamap. Yu i hatwok long en na yu hamamas long lukim kaikai i kamap long nupela gaden, o kamap bilong nupela pikinini we long 9 mun mama i save kisim taim tru na go long mak bilong indai stret long taim bilong karim. Tu hamamas i save stap bihain long gutpela wokabaut bilong ol man long kisim ol samting. Ol Kristen long olgeta hap bilong graun tu i gat ol taim we ol i save kam bung wantaim na hamamas. Wanpela bilong dispela taim em long Ista. Hamamas bilong Ista i bikpela samting tru. long ol Kristen bilong wanem Ista em wanpela bung bilong bilip na laip. Em wanpela taim we mipela i hamamas long Jisas Krais husat i winim indai, sin na satan na givim laip long olgeta man husat i bilip long em na ol man husat i bihainim em. Krais i wokim hap wok bilong em long givim laip na mipela i hamamas long dispela laip em God yet i givim. Tasol taim mipela i hamamas na tok tenkyu long strongpela pawa bilong God mipela tu i mas holim strong dispela Kristen bilip bilong mipela na wokim ol Kristen wok olsem lukautim laip na halivim ol narapela long hamamas. I gat planti sin pasin insait long olgeta hap bilong graun long nau. Na dispela i bikpela hevi tru bilong wanem kain sin pasin i wok long pasim rot bilong ol manmeri long hamamas long laip. Kain sin pasin tu i wok long kamap insait long Papua Niugini. I gat planti mi pasin, man i bagarapim laip bilong narapela na tru tru i luk olsem nogat gutpela as bilong hamamas. Ating mipela i mas traim na lukluk ken long laip na pasin bilong mipela we i save bagarapim laip bilong mipela yet o ol narapela manmeri. Ol bagarap em i save kamap long ol bus na

long ol abus long bus, solwara na wara em ol pipel i save painim long kaikai na long ol manmeri yet i wok long kamap bikpela. Taim dispela kain bagarap i stap, i no gat gutpela as bilong hamamas olsem na mipela i mas lukluk long dispela na traim painim ol rot bilong stretim dispela ol hevi. Sampela bilong dispela ol kain bagarap i save kamap long longlong bilong yumi ol manmeri yet. Wanpela ples we kain longlong pasin i wok long bringim moa pen na hevi i stap long ol haus sik bilong mipela. I no longtaim igo pinis, mi bin go long lukim brata bilong mi long hausik long Lae na mi bin kirap nogut long lukim ol sikmanmeri husat i laik kisim marisin i wok long silip long flo na i no bin gat ol gutpela fom bilong sindaun long halivim ol liklik na daunim pen bilong ol. Pasin bilong stretim sik em wanpela bikpela samting. Save tasol long rot bilong luksave long sik na givim marisin em i no inap. Long lukautim ol sikman, ol lain husat i wokim dispela wok i mas wokim wok bilong ol wantaim belisi na belsori. Ol hausik em ol ples we ol manmeri husat i gat sik inap long kamap orait long en. Sapos dispela i no save kamap long ol sikmanmeri, dispela i soim olsem sampela samting i no stret. Mi laik toktok strong long ol lain husat i lukautim hausik long lukluk long dispela na long gavman long traim na stretim ol hausik bilong mipela i go antap long mak we ol sevis ol givim i ken inapim tru ol laik bilong ol sikman. Ol manmeri i no inap hamamas sapos ol i no strong na stap gut. Ol i ken hamamas taim ol i stap laip yet na i no taim ol i dai pinis. Narapela samting em mipela i mas traim long lukluk long en em long Lo na Oda. Ol manmeri i no inap hamamas sapos ol i save olsem birua i ken bungim oi. Nem bilong kantri i bagarap pinis long ol kainkain stori nogut em ol nus ripot i save kamap long ol Lo na Oda problem. Ol taun na siti bilong Papua Niugini i wok long luk olsem ol haus kalabus we i gat ol bikpela banis na ol wasman. Long 25 kris-mas i go pinis, Papua Niugini i no bin luk olsem. Gavman bilong tete na ol nesenel lida, ol komyuniti lida na lida bilong ol sios i gat bikpela wok. Dispela

wok em long stretim hevi bilong Lo na Oda.

Taim ol i stretim dispela hevi, bambai ol pipel bilong Papua Niugini na ol lain bilong narapela kantri husat i kam long lukim kantri bilong mipela maski ol i lapun o yangpela, ol i ken hamamas tasol. Pasin bilong hamamas long Ista em ol Kristen i save holim long tingim wanpela husat i save

Toktok bilong Het Bisop bilong ELC Bisop Dokta Wesley Kigasung

wari tru long ol kain biket pasin na sin pasin long olgeta hap bilong graun na i bin lusim laip bilong em yet long soim wari bilong em. Em i dai long sevim ol manmeri na long bringim rot bilong gutpela sindaun i kam long ol manmeri husat i bihainim ol skul bilong em. Em kamap olsem

'Belisi Pikinini' long bringim bel isi na gutpela sindaun i kam long graun we i wok long bagarap long sin pasin na tu long strongim ol lain husat i wok long stap long hevi na wari. Hamamas bilong Ista em hamamas bilong luksave long kirap bilong Jisas Krais husat yet i 'Rot, Tok tru, na Laip'.

Mipela save hamamas long Ista bilong wanem toktok em Jisas i wokim i save strongim mipela long laip bilong mipela. Long kirap bilong Jisas, mipela i save hamamas long laip we mipela i ken stap hamamas igo igo inap taim mipela i dai. Hamamas bilong Ista tu i soim mipela olsem maski ol wanem kain hevi mipela i bungim, sapos mipela i bilip strong long Jisas,

mipela inap long painim gutpela sindaun na hamamas na kisim nupela strong long wokabaut bilong yumi long graun. Dispela kain tingting i ken kamap olsem was na strong bilong mipela long dispela nupela milenium insait long laip bilong mipela olsem ol kristen, sios, ol lida long lokal level na dnesenel level na long gavman.

EASTER SAVINGS!

For half price, you can

call your loved ones and
friends, send special greetings

..... and save!!

Happy Easter!

Remember when you call during
off-peak times.... You save
HALF of your STD charges.



**Make a surprise phone
call to someone this
Easter!**

OFF PEAK TIME

**STD Calls are 50% cheaper between
5.30pm and 7.30am weekdays on Sunday.**



TELIKOM PNG
Now we're really talking!

Taim bilong stap bung wantaim

LONG kantri bilong yumi i gat planti ol man meri i no harim tok na bihainim lo bilong laikim ol naiba bilong yu olsem

Ista toktok bilong Presiden bilong Nesanel Kansol ov Wimen Susan Setae

laik kam long PNG long autim stori bilong Jisas. Sapos i bin nogat stori bilong Jisas bai

dispela kantri i stap we nau? I gat taim bilong kisim seken sans, we Jisas Krai isave givim oltaim. Na sapos yu lida, man oa meri, ating yu mas tanim long God, laikim planti moni, laikim bik nem, wokim pasin bilong korapsen, na baim ol man meri long winim wei bilong yu long dispela hap long eleksen. God i givim yumi seken sans long long tok sori long ol sin bilong yumi. Yumi ol lida i gat bikpela hevi long lukautim ol man meri bilong dispela kantri. Sapos yumi no tanim long ol sin bilong yumi, olsem ol lida bai gat blut bilong ol pipel long han bilong yumi. Wanpela dei bai yumi sanap na tokim God long wanem kain wok yumi wokim long giraun. Nau yumi hamamas long Ista na mi singaut i go long ol lida na askim ol long tanim long ol pasin nogut bilong ol na askim Jisas long kamap Savia bilong ol. Mi tokim yu bai yu hamamas olsem yu kisim Jisas olsem Savia bilong yu.

Ol miseneri i bin lainim ol pipel bilong Papua Niugini long ol Kristen pasin olsem long tok tru, long laikim, long fogivim, long meknaise na long lainim ol gutpela na stretpela pasin. Dispela laikim bilong Jisas Krai i brukim ol spia, arona ol stik bilong ol lain save kaikai man. Em i laik bilong Jisas Krai na stori bilong em long Ista i mekim yumi olgeta wanpela wantaim ol lain bilong hailans, ol lain bilong ol ailen na ol lain save stap klostu long ol solwara. Dispela i wokim yumi kamap wanpela, taim yumi i gat ol planti kalsa. Yumi kamap wanpela famili long nem bilong Jisas Krai.

Long dispela Ista, em i narakain bikos em i nambawan Ista bilong dispela nupela milenium tasol long wankain taim yumi mas save olsem Jisas i kam long dispela wol long savim yumi olgeta long sin na korapsen, na 200 yia i go pinis taim ol misenari i karim stori bilong Jisas i kam long PNG.

Em i dispela tok, long 2000 yia i go pinis long stori bilong Jisas i kirap gen i wokim ol misenari i

dispela kantri i stap we nau? I gat taim bilong kisim seken sans, we Jisas Krai isave givim oltaim. Na sapos yu lida, man oa meri, ating yu mas tanim long God, laikim planti moni, laikim bik nem, wokim pasin bilong korapsen, na baim ol man meri long winim wei bilong yu long dispela hap long eleksen. God i givim yumi seken sans long long tok sori long ol sin bilong yumi. Yumi ol lida i gat bikpela hevi long lukautim ol man meri bilong dispela kantri. Sapos yumi no tanim long ol sin bilong yumi, olsem ol lida bai gat blut bilong ol pipel long han bilong yumi. Wanpela dei bai yumi sanap na tokim God long wanem kain wok yumi wokim long giraun. Nau yumi hamamas long Ista na mi singaut i go long ol lida na askim ol long tanim long ol pasin nogut bilong ol na askim Jisas long kamap Savia bilong ol. Mi tokim yu bai yu hamamas olsem yu kisim Jisas olsem Savia bilong yu.

Mi laik tokim ol meri long PNG long wokim olsem Jisas i wokim. Em i karim traipela sem taim ol pipel i singaut long em na wokim em i sem long ai bilong olgeta manmeri. Olsem na yumi mas hamamas long dispela dei, dei Jisas Krai i kirap gen.

Ista em i taim bilong famili long kam na stap na bung wantaim. Tasol mi liak lusim dispela liklik toktok wantaim yupela ol meri. Taim Jisas slip long matmat ol meri wok long tingting long ol yet, "Husat bai rausim ston long dua bilong dispela hap?" Na taim ol i go kamap dua i op pinis. Olsem na yupela mas tingim, bai i gat planti samting bai pasim rot bilong wokabaut bilong yu tasol yu mas painim we.

Noken tok maski, yu mas go yet na bai i gat sampela kain samting i halivim yu.



OL lain bihainim rot bilong kruse. Dispela i kamap pinis long planti ples we ol Katolik manmeri i stap long en. Long wokabaut long bus ol i save wokim penens na sori long ol sin bilong ol long redim ol yet long go insait long Ista.



CENTRAL PROVINCIAL GOVERNMENT
GOVERNOR OF CENTRAL PROVINCE

Gut Fraide na Ista Sande em ol bikpela pestode tru bilong wanen em ol taim em ol Juda na ol Kristen i save tingim indai na kirap bilong Jisas Krai.

Jisas i bin indai long Kalvari long kisim bek yumi ol sin manmeri. Long tripela de, ol laim husat i kilim em i ting em i dai olgeta. Daunpasin na strongpela bilip bilong em i wokim ol i bel hat na ol i nilim han bilong em wantaim ol bikpela hevipele nil long han na lek bilong em. Dispela kain sin em as tru bilong em long indai. Ol sin bin pasim tru ai na tingting bilong ol. Dispela sin em wanpela tasol we i bin wokim na nambawan man na meri i bin pundaun long sin taim ol i kaikai pikinini bilong diwai em God i tambu long en. Tasol Jisas i no bin belhat long ol lain husat i bin givim pen long em. Olsem wanpela gutpela man, taim em i hangampa long diwai kros em i sori long ol lain husat i givim pen loong em na i bin lusim sin bilong ol.

Em beten olsem "Papa lusim sin bilong ol bilong wanem ol i no save wanem samting ol i wokim" - (Luk 23:34).

Long diwai kruse, Jisas i bin soim olsem em i laikim tru olgeta manmeri. Ol wantok, Jisas i soim pinis olsem em i laikim mipela tumas taim em i dai ong diwai kruse. Em i bin soim dispela pasin long mipela long daunpasin long oraitim mipela. Sapos Jisas Krai Redima bilong mipela i bin wokim lusim sin bilong ol lain husat i bin givim pen long em long oraitim ol, mi bilip olsem mipela tu i ken lusim ol sin bilong ol narapela.

Hamamas gut long Ista!

Hon. Opa Taureka
Governor
Central Provincial Government



OPIS BILONG OPOSISEN LIDA



TOKTOK BILONG ISTA I KAM LONG OPOSISEN LIDA
Hon. Bill Skate CMG MP
Lida bilong Oposisen

Ista em taim bilong yumi long lukluk bek long ol samting em yumi bin wokim long laip bilong mipela na long ol rot we mipela i bin sindaun wantaim ol narapela manmeri long komyuniti.

Taim mipela i tingim indai na kirap bilong Jisas Redima bilong mipela, mipela mas lukluk ken long laip bilong mipela na traim long stretim sindaun bilong mipela. Mipela i ken traim long lukluk long ol rot we mipela i ken wokim kamap gutpela wok long kantri bilong mipela. Ol manmeri long olgeta hap i ken lukluk long nupela rot bilong halivim ol brata na susa bilong ol husat i stap gut.

Olsem ol lida long Nesanel Palamen, mipela i mas olgeta taim traim long painim rot bilong stretim sindaun bilong ol manmeri bilong mipela. Long nau taim mipela i kisim taim long wanem ekonomi biong mipela i no stap gut, mipela i taitim bun tru long wokim bambai kantri i ken go het yet.


Prais bilong ol samting em mipela i save salim i wok long go antap na ekonomi bilong ol Asian kantri i wok long kamap gutpeia ken. Nogat wanpela man long dispela graun i stretpela olsem na mipela i mas traim long stretim mipela yet na traim long wok strong long kirapim kantri. Taim mipela i wokim olsem, mipela i hamamas long Ista long rot tru em Jisas na God i bin laik bai ol manmeri i bihainim.

Hamamas gut long Ista na God i ken biesim naispela kantri bilong mipela

Bill Skate CMG MP



• Telikom skiper Abia Abia i kisim rana trofi long PNG referees darekta Paul Pondo. Telikom lus long Uniteck 3-0 long Lahi ol man pri-sison gren final las Sunde.




• Capten bilong Yunitek i so-of wantaim trofi bilong em.



• 9s eksen long Lae ragbi lig long wiken.namel long Magani na Morobe Tigers. Magani win Tigers 18-6. Poto: Sape Metta.




• Stail bilong boi Telikom ya. Ruben Yanga i traim long trikim Paul Komboi bilong Yunitek.



• Pre-sison gren final eksen long Lahi Soka. Telikom Ruben Yanga i traim long winim ol difenda bilong Yunitek. Ron long sait em Paul Komboi. Yunitek win 3-0.



WANTOK SPOT



Givim moa taim long redim tim: Daniels

PAPUA Niugini Futbol Asosiesen (PNGFA) i mas givim moa taim long redim nesanel tim bilong stap insait long intanesenel o rijonel soka sempionsip.

Dispela em tingting bilong namba tu vais presiden bilong PNGFA Seth Daniels bihain long em i lukim PNG nesanel soka tim i lusim olgeta foapela gem long 2000 Melanesian Kap soka tonamen.

Dispela tonamen i bin stat long Sande wik antap na pinis long Sarere las wiken.

Mista Daniels i bin go olsem deliget bilong PNGFA long dispela soka tonamen. Em yet i amamas long ol pilaia tasol em i no save wanem samting i rong long ol i no save skorim gol.

Wantok i bin toktok wantaim em las wik na em i amamas tru long lukim ol pilaia bilong PNG i putim gutpela pilai. Maski ol i lus, ol i kamapim gutpela pasin bilong spotsman na pilai strong tru.

Long kain pasin bilong PNG tim, na ol ogenaia bilong Melanesian Kap i givim ol Fair Play awot.

Kosa bilong nesanel tim John Davani i tok i tru PNG i lus long olgeta gem, dispela i helpim tru ol yangpela pilaia long tim long

kamap strong long intanesenel soka tonamen.

PNG tim i gat planti ol yangpela pilaia olsem Hans Fred, Kule Matu, Isaiah Jonah, Vincent Sili, John Kaling, Tapas Posman na Paulo Patterson long kisim moa eksperiens long intanesenel tonamen.

Davani i no laik haitim sem long tim i lus i tok olsem ol pilaia bilong em i givim taim na pilai gut tru long fil.

"Sapos ol i pilai long PNG, ating ol soka sapota bai save long wanem kain toktok em pilai gut. Skoa em i no bikpela samting, tasol PNG tim i kamapim gutpela salens long arapela tim," Davani i tok.

Em i tokim Wantok olsem i lus long olgeta gem. Long namba wan gem egensim Fiji, PNG i lus 4-0, Nu Kaledonia 5-1, Solomon Ailan 4-1 na Vanuatu em 5-1. Olpela straiika bilong Pot Mosbi na tu Yunivesiti soka klab, Noel Vari i go pas long tim long Vanuatu ya. Em i no slek yet.

Davani i ting tripela kantri olsem Fiji, Nu Kaledonia na Solomon Ailans i winim tru ol arapela kantri long rijen.



• Diane Raka bilong Waliya i kisim Bes Pilaia bilong tonamen long divisen bilong ol meri long Paul Pondo. Foto: Sape Metta.

Fiji i bin go pilai insait long wanpela nesanel soka tonamen long Malaysia long redim ol yet long Melanesian Kap. Na Solomon Ailans i go pilai long Brisbane, Australia bipo ol i go long Fiji, ol i lus long dispela tupela gem, tasol

ol i pilai gut tru long kamap namba tu long Fiji.

Nu Kaledonia, olgeta soka man i save i kisim yet strong bilong kantri Frens long ol kain trening bilong ol long spot insait long rijen.

Bihain long olgeta gem i pinis, Davani i tok, Daniel yet i tokim em long PNGFA o kosa i mas givim moa taim long redim tim. Na Davani yet i sapatim dispela toktok bilong namba tu bos bilong soka long kantri.

Sofbal sempionsip on

... Lae bai salim developmen skwat

LAE Sofbal Asosiesen i stapim tupela arapela tim long noken stap insait long nesanel sofbal sempionsip long Rabaul.

Ripot i kam long Lae i tokaut olsem planti ol pilaia insait long tim i ting olsem das bilong maunten paia i ken kamapim sik na i no laik stap insait long dispela sofbal sempionsip.

Tasol Lae bai salim yet developmen skwat long stap long dispela tonamen.

PNG SOFBAL RIPOT

Sekretari bilong PNG Sofbal Federesen Francis Rangattin i tokaut olsem 9-pela asosiesen i baim afiliesen fi.

Rangattin i tok olsem asosiesen i baim na Pot Mosbi, Lae na Goroka tasol i no baim afiliesen. Tasol ol dispela asosiesen i tokaut olsem ol bai baim taim ol i kamap long Rabaul. Ol senta i afiliet em Kokopo, Rabaul, Lihir, Wewak na

Ramu. Las wik Lae i tokaut olsem sapos ol asosiesen i no afiliet, em i min olsem sempionsip i no bihain lo bilong sofbal federesen.

Rangattin i tok ol bai mekim save sapos ol asosiesen i no baim fi.

Olgeta wok redi i kamap gutpela tru long Gazelle Penansula na tu long Kokopo.

Rabaul District edministresen i sapatim tru Rabaul Sofbal Asosiesen long mekim dispela sof-

bal tonamen i kamap gut.

Ol tim husat bai kamap em Lae, Port Moresby, Mt Hagen, Goroka, Kimbe, Lhiri, Kokopo, Madang, Rabaul, Wewak, Bulolo, Ramu, Rabubil na Pomio.

Namba wan ol lain pilaia long kamap long Rabaul em tude. Ol pilaia bai kam long Pot Mosbi, Lae, Mt hagen na Goroka.

"Mipela i amamas tru olsem komyuniti insait long Rabaul na Kokopo i givim bikpela sapat stret

long dispela tonamen," Rangattin i tok.

Meya bilong Rabaul Ephraim Jubilee bai tok welkam long long ol tim long Epril 20.

Ol samting i stap long program bilong em pasin Tolai na tu ol biknem pilaia bilong sofbal bai sanap na mas.

Olgeta gem bai kamap lor Rabaul na Kokopo long givim sai long ol pipel long kamap na luki dispela sempionsip.

Em i Gutpela Em i Tuna Em i bilong PNG stret...

PROUDLY



- ◆ Tuna kam long solwara bilong Papua Niugini Stret.
- ◆ 100% tuna mit stret, nogat bun na nogat skin.
- ◆ Planti mit istap long olgeta tin.
- ◆ Nambawan tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- ◆ Prais inap tru long yu baim.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.